



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tiryimyim@aolima tir yimyim TAPAK 3



### Xi künati Taiwan tezüngzüktep nung anidaksü molung: Biden

### Guwahati nung model Rajkanya Baruah tanaben apu



VOL. XVIII NO. 356 (ADOK 356) DIMAPUR YANGTEPNÜ (THURSDAY) MONGPUTENI (OCTOBER) 07, 2021 ₹ 5.00

## DoSE-i school tem lapokshiba atema tetuyuba agütsür

**Dimapur, October 6, 2021 (TYO):** Nagaland nung District Education Officer (DEO) ajaki school tem tanaben lapokba atema applications meshitsü tuyur ta Directorate of School Education (DoSE)-i metetdaksüo.

District Task Force temi format adokba ama DEO temi sorkar aser nija school tem dang nungi applications meshitsü aser

tekaratiba nung pei pei District Task Force nem agütsüsüla, ta DoSE-isa ashi.

Maneni, District Education Officer aser Sub Divisional Education Officer ajaki pei District Task Force ajanga agütsüba Permission Orders tekaratiba nung sorkar aser nija school ajak nem agütsüsüla, ta DoSE-isa metetdaksü.

## DDCF-i telok 15 indang o meyiptsür

**Dimapur, October 6, 2021 (TYO):** October 5, 2021 nü Nagaland state adena orr alir telok kar densema telok 15-i DC Dimapur office complex tasenbai belenba pusema sangdong ka agütsüba nung Dimapur District Citizens' Forum (DDCF) ya pei sasa tentetba aser nübortemi magizükba telok ka ta shia lir.

Iba atema DDCF-i Bodbarnü sangdong ka nung DDCF mezüing tentetba putiotsü aser Dimapur DC office belenba anema noktakba osang jangjatsüo.

"May 25, 2010 nü lokti tentet 24 tema nung lennirtem Thahekhü Village nung adenshi aser idangji Dimapur nung lisopur aser lisopur masürtem ajak adenba telok ka tentetsü bangzüngtep. Senden nungsa iba telok dang Dimapur District Citizens' Forum (DDCF) ajatsü lemtet" ta Media Cell, DDCF-isa ashi.

Lisopur telok 15 nungi Chakhesang Hoho Dimapur District (CHDD), Rengma Hoho Dimapur, Chakhro Angami Kuda

Union (CAKU) tirtemi DDCF tentetba nung sign süa lir, ta Media Cell-isa metetdaksü.

Külen, Dimapur DC office belenba anema tang mapa inyakba ya DDCF-i dang inyakerba masü. August 25, 2014 nü Unity Hall, NCD Building nung Dimapur nung aliba civil society ajak senden amen aser idangji DDCF kübok Dimapur DC office belenba anema noktaksü bangzüngtep, ta Media Cell sangdong nungsa shia lir.

Iba sülen nungi Dimapur nung CSOs balala nungi shimtetba Core Committee ajanga Dimapur nung tangatetba kasa aliba CSOs ajaki Dimapur DC office mebelendaksütsü atema mapa inyaka arur. Anungji, nübortemi DDCF ya nübortemi pusema nungitba telok ka masü ta mejembitsü ayongzüker, ta Media Cell-isa metetdaksü.

DDCF-isa May 25, 2010 nü lokti senden nung nisung 84 adenba aser pamoki sign asüba kulikaket ka lemsatepogo.

## Cabinet nem 'Nagaland reservation policy draft' agütsüsü

**Kohima, October 6, 2021 (TYO):** Nagaland nung reservation policy atema Cabinet Sub Committee Working Group-i yakta State Cabinet nem osang agütsüsü.

Bodbarnü State Secretariat nung Working group senden ka amenba sülen Deputy Chief Minister Y Patton-i iba osang sangoktsü.

Nagaland nung reservation policy atema Cabinet Sub Committee-i draft report ka state cabinet nem yakta agütsüsü, ta pai ashi.

Tanü senden nung civil society teloktem nungi teshimtet nübotem aden aser züngsem ajaki reservation policy indang draft agizükogo, ta Y Patton-isa metetdaksü.

## COVID-19 Nagaland: 31 dak putet, 32 taneptsü angu & 1 asü

**Kohima, October 6, 2021 (TYO):** Nagaland nung Bodbarnü nisung 31 dak COVID-19 putet aser parnok züngsem nisung ajak agi 31,373 kümogo.

"Tesüiba ghonda 24 tsüingda nisung 31 dak COVID-19 putet. Parnokji Dimapur nung 11, Tuensang nung 8, Kohima o Mokokchung nung pungugu (5) aser Mon o Phek nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-isa ashi.

"Kasa mapang COVID-19 puteta alir nisung 32 taneptsü angu. Parnokji Dimapur nung 12, Kohima nung 8, Phek nung 7, Tuensang nung 3 aser Mokokchung nung 2 lir" ta paisa ashi.

"Tang nisung 311 anepaludar saka parnok 237 dakbo shirangba yimya kecha mali" ta paisa shisem.

Bodbarnü Dimapur nung COVID-19 puteta alir ka asüba züngsema tasür ajak agi 667 kümogo, saka nisung 15 dakbo tanga tashidak liasü, ta Dr Kikon-isa ashi.

"Mongulbar tashi nung nisung 692,700 nem COVID-19 vaccine indang dose 10,82,985 agütsüo" ta State Immunization Officer, Dr Ritu Thurr-isa ashi.

"Vaccine agirtemji frontline workers 60,942, healthcare workers 15,996, arishi küm 45 ser tempur 199,027 aser arishi küm 18 nungi 44 tsüingda alir 416,735 lir" ta paisa ashi.

"Vaccine agirtem rongnungi nisung 390,285-i dose anaprong agiogo. Parnokji frontline workers 47,545, healthcare workers 13,292, arishi küm 45 ser tempur 141,786 aser arishi küm 18 nungi 44 tsüingda alir 187,662 lir" ta Dr Thurr-isa metetdaksü.

## Khristmas matongdang Naga yimjung tenangzüktep agütsü akok

**New Delhi October 6, 2021 (Agencies):** Mongulbarnü National Socialist Council of Nagaland (Issak-Muivah) tongti tanishirtem Delhi tongogo aser iba ajanga taküm Khristmas matongdang Naga yimjung tenangzüktep agütsü akok.

Centre-i iba onük tekaratiba nung angatetepnür.

NSCN (IM) general secretary Thuingaleng Muivah, NSCN (IM) collective leadership emissary VS Atem aser RH Raising nungertem Delhi tonga aruogo.

Taoba IB special director AK Mishra-i Centre sorkar tenüing nung jembitsü.

Mishra-i Naga yimjung olemtep atema interlocutor

inyaktsüba indang official sangdong ka magütsü lir saka sorkari pa inyaktsüba sayuogo.

Tawa Mishra-i NSCN (IM) dangi züluba shidi ka nung "PMO representative" ta züluba liasü. Iba ya taoba interlocutor RN Ravi-ia amshia aruogo saka pai September 22 nung iba mapa nungi anena liasü.

Küm ana shi ka yimjung olemtep melii aruba sülen September 20, 2021 nü Dimapur nung olemtep tenzüksüba liasü. Iba sülen NSCN (IM)-i Assam aser Nagaland chief minister tem den senden amen.

Himanta Sarma-i Home Minister Amit Shah den ajurutepba sülen NSCN (IM)-i Nagaland aser Assam chief

minister tem den ajurutepba senden amen.

Taoba senden nung telok anaprongi Naga yimten tebilemstü tekaratiba nung angatetepsüla ta molungtepogo.

"Nagaland nung yimjung aser terenlok bener arutsü atema telok anaprongi telemtetba aginür. Khristmas matongdang yimjung tenangzüktep agütsü akok" ta keddangsiir kati ashi.

Centre aser NSCN (IM) tsüingda August 3, 2015 nü Framework Agreement nung sign asü. Külen, 2017 nung Naga National Political Groups dena olemtep tenzüker aser kasa küm parnok dena Agreed Position nung sign süo.

## Centre-i VIP pur 'pocket money' atema sen yoker: RPP

**Dimapur, October 6, 2021 (TYO):** Rising People's Party (RPP)-i ita ka tejakdang 2019-20 tsüingda Nagaland nung Centrally Sponsored Schemes inyakba nung tim mesüi inyakba osangtem meshia liasü aser iba atema nisungtemi osang agütsüo.

"Aluyimer nem agütsüba sen tim mesüi amshiba osangtem angazükba ajanga Union Tribal Ministry ajanga sen agütsübaji Minister aser VIP tem nem pocket money agütsüba ama lir" ta RPP-i metetdaksü.

"Mapatong 18 sayuba nungi kar dang shitak inyaka ama ajiteter saka department nungi

completion certificates ano mangu lir. Mapatong inyakba mesüra meinyakba mereprangtsü kechiyong mapa inyaktsü mapang latetba ita 18-24 tembangogo, anungji onoki bangdakpur tsüingdang ken o benoktsü" ta Rising People's Party (RPP)-i metetdaksüo.

"Repranga ano nung mapatong teimbaka tezüluba nungdang inyakba ama ajiteter aser iba ajanga state sorkari centre sorkar ashiojka tiyazü nung mapa inyakba jungkai adoka sayur" ta RPP-isa ashi.

Tribal Affairs Ministry ajanga mapatong 18 inyaktsü sen lezmüksü aser 2020 tashi nung

Planning and Co-ordination Department-i item mapatong inyaka liasü.

Mapatong kar 'Unknown' category nung lir aser itemji jangjateptsü kanga tasak kechiyong farming & allied activities den sendaka lir. Tsüinglangen agüja aliba Sl. no. 11-18 mapatongtem inyaka ta süra itemji VIPs indang nija farm tem renlokba asütsü. Tiyazü nung central scheme inyakba ya ozüing alema lir kechiyong Tribal Ministry-i Nagaland nung lisopurtem aser sensakertem ajangzüksü atema mapatong lezmüksü, ta RPP-isa metetdaksüo.

S/NONAME OF THE PROJECT	COST OF THE PROJECT	AREA/PLACE	PROJECT STATUS
1. Establishment of Tribal Hostel	Rs. 1 Crore	Niuland, Dimapur	Incomplete
2. Food Processing Plant	Rs. 4 Crore	New Minister's Hill, Kohima	Non-existent
3. Vocational Training Institute	Rs. 1. 20 Crore	Diphupar 'B', Dimapur	Non-existent
4. Vocational Training Institute	Rs. 80 Lakhs	Old Minister's Hill, Kohima	Non-existent
5. Indoor Stadium	Rs. 1 Crore	Seyochung, Kiphire	Non-existent
6. Construction of Playground and rostrum	Rs. 1 Crore	Changkong village, Mon	Implemented
7. Community Hall	Rs. 1.50 Crore	Jotsoma village, Kohima	Under construction
8. Working Women Hostel	Rs. 1.20 Crore	Mon Non-existent	
9. Organic Food Processing Plant	Rs. 2 Crore	Tuli, Mokokchung	According to the department Work-order is yet to be issued Implemented
10. Old Age Home	Rs. 68 Lakhs	Sungratsu, Mokokchung	
11. Integrated Farming: Intended to benefit whole village	Rs. 1 crore	Mongsemyimti, Mkg	Unknown
12. Coffee Plantation: Intended to benefit 400 beneficiaries	Rs. 1 Crore	Botsa block, Kohima	Unknown
13. Fishery and Hatchery Unit Intended to benefit 300 beneficiaries	Rs. 50 Lakhs	Sovima village, Dimapur	Unknown
14. Piggery and Dairy Farming: Intended to benefit 200 beneficiaries	Rs. 50 lakhs	Chiechama village, Kohima	Unknown
15. Multi-Farming: Intended to benefit 200 beneficiaries	Rs. 50 Lakhs	Vidima village, Dimapur	Unknown
16. Multi-Farming: Intended to benefit 200 beneficiaries	Rs. 50 Lakhs	Akuk Village, Wokha	Unknown
17. Cultivation of Indigenous Wild Berries: Intended to benefit 300 beneficiaries	Rs. 75 lakhs	Sokhuvi, Dimapur	Unknown
18. Community Diversity project	Rs. 2. 95 Crore	Longleng district	Unknown

## Chumukedima nung ADC mapa lezmüksüba jangjashitsür: Home Department

**Dimapur, October 6, 2021 (TYO):** Nagaland Home Department-i Bodbarnü Chumukedima nung Additional Deputy Commissioner (ADC) mapa lezmüksüba indang osang jangjashitsüo.

March 11, 2021 nü Cabinet senden nung Deputy Commissioner Office, Dimapur nung new Complex, Chumukedima-i belentsü telemtetba agia liasü aser Home Department nem DC office aser tanga office tem mapang lemsar

belentsüba mapa lezmüksü.

Ajisüaka, telok kari Dimapur DC office belentsü memolungba agi Cabinet-i August 10, 2021 nü Deputy Commissioner Office Complex, Chumukedima nung ADC, EAC aser Sub-Treasury Office belenoktsü lemtet, ta Home Department-i metetdaksü.

Iba telemtetba ya public ajangzüksü aser Deputy Commissioner Office, Dimapur pongpadaksütsü atema agiba liasü, ta parnokisa ashi.

Iba telemtetba nung

ajemdaker Commissioner Office Complex Chumukedima nung ADC inyaktsü atema additional officer ka mapa lezmüksü aser Chumukedima nung ADC den yariteptsü atema EAC Seithekima mapa belen ta Home Department-isa metetdaksü.

Telok balalai Dimapur DC office belena aoba nung tebilemstütem abenba ajanga sorkari September 7, 2021 nü Home Department nem tetuyuba agütsübatem sota atatsü telemtetba agiogo.



Tanü Mopongteni (October) 06, Rasemnü Mokokchung town nung Eastern Nagaland Peoples' Union-i anir tawa Mokokchung nung Phom-tsür ka tepsetba anema tejashi sayua lokti yimdong süa jajaba noksa nung angur. Nisung tepseter nem tapet temerenshi agütsüsüla ta parnoki government nem takangba ka nenshia metetdaksüogo.

## Dimapur nung anogoshi face mask seret 13.6 shi indoker

**Dimapur, Mongputeni/Oct. 06 (TYO):** Taoksatsüka PPE jana prokshiba indang report ka Dimapur nung amenoka aliba environmental NGO, Living For Environment (LIFE) ajanga renemba October 6, 2021 nü Dimapur Municipal Council, Administrator, Albert Ezung ajanga sayaja liasü.

Iba maparen ya International Association of Traffic and Safety Sciences Forum (IATSS) ajanga senotsü teyari agüja IATSS Alumni Association of India (IAAI) kübok social enterprise forum management, PEKKORN International aser LIFE ajanga inyaka liasü.

Iba sentong nung Albert Ezung-i ashiba agi, asen takum nung jana ya tongtipang shilem ka lir saka aikati jana ya komasür adoker mesüra koma indoktsü, itemji memetet.

Iba yagi asen takum aser libajen nung kanga mejungi kongshir. Jana-reja anepaluba ya agency ka kisüingi ketdang mesütetsü, yangji nübur ajungai shilem agütsüla, ta pai ashi.

Municipality-i sabang balala ajanga nüburtem nem angatetdaksütsü meranger aser temelenshi aliba ajiteter. Lanur aikati Dimapur Municipal Council dang asündangogo aser yimti mürekba nung shilem tulu agir, koba yimya tajung ka lir, ta pai ashi.

LIFE ajanga Dimapur nung rangloker disposable face masks amshiba indang report agiba asoshi pai tenüngsang agütsü aser iba yagi nüburtem nem shisa agütsüba tsütsü shilem tulu agütsü aser nüburtem nem awareness jenjang balaka agütsütetsü, ta pai ashi.

Dimapur nung disposable face-mask ayoker, institution/establishment nung itemji amshiba, indokba yimya tali tajungba nung metettsü, disposable face mask aki yimti menemba aser makamaiter temi amshiba tali tajungba nung metettsü nükjidong nung iba study ya agi, ta LIFE Founder Niksungla-i ashi.

Dimapur nung iba survey agiba nung 2011 census nung ajemdaker nütsüng yongsük

lakh 1.22 lir, kong anogoshi disposable face mask ya tejang 4058 shi ayoker aser ita nung tejang lakh 1.11 ayoker, ta bushitet.

Anungji iba face mask yagi anogoshi jana seret 13.6 adokdaksür aser küm nung seret 4023 adokdaksür.

Ajisüaka iba oset ayokertemi anogoshi ayokba indang record tejangja anepalu masüba, COVID-19 tenokdangbatem aser senotsü peria maliba ajanga state nung disposable face mask amshiba aser ayokba shidak memetet.

Disposable face mask jana ajanga tzu-mopung menentsüba lir, anungji danga jana den bendanga iba jana bendentsü atema totuyuba agütsüsüla, ta bushitet.

Face mask jana bendanga amshiba aser amshiba yimyatem makamaiter nema angatetdaksütsüla, ta ashi.

Disposable face mask jana tebilemsü kisüng masü saka tang jana-reja ketdangsüba nunga temelenshitsu lir, ta parnokisa ashi.

## Noklak nung Tsokum benjong mungogo



**Dimapur, Mongputeni/Oct. 06 (TYO):** Noklak jila nung Khamniungan nungertemi Tsokum benjongmung KTC Treasurer kidang October 5, 2021 nü munga liasü, kong Deputy Commissioner, Noklak, Hiazu Meru ya tesemdangertongti ka ama arua shilem agi.

Iba benjongmung sentong nung jembiba mapang, Naga nung puti otsü ya tebang agi jembiba aser benjongmung balala nung ajemdaker asen sobaliba, yimsü-yimpong, sübosolemsü aser achiajemba angazüker koba asen ayak lir, ta Hiazu Meru-i ashi.

Benjong ajanga dang nüburtem lungjemdaksür aser telungjem lidaksür.

Akhi mapang pei poksünga liasü aser yimtsüng ajak shinga daka memetaloki lia aru, ta pai ashi.

Asen otsüla-oboula nungertem aluyimer liasü aser aluyimba ajanga parnok takum nung tongti shilem agi, aser

parnoki temoatsü nung alu arutsü atema benjong-bentsü ayongzüka liasü, ta Meru-i ashi.

Deputy Commissioner ajanga iba sentong nung dena alirtem dang pei tetsü-tebou temi amshiba yimya tajungtem amshitsü ayongzüker aser kasaji tarutsü putu nem angazükdaksütsü ashi.

Khamniungan Tribal Council ajanga Tsokum benjong ayongzüka amungba atema pelaba lemsatepba mapang, iba benjong ajanga Khamniungan nung tali moatsütsü amanger, ta Meru-isa ashi.

Noklak Town indang Head GB, Heme-i ashiba agi, alu aruba tenzüka Tsokum benjong ya anogo ti tashi amunger aser iba mapang külem-keja maparen balala inyaker.

Tsokum benjong mapang kibong ajaki sarasademer aser alu nung temoatsü alitsü aser kiset shiruru azük-arua kidang kibong nung anema alitsü atema kiset shiruru tenla

agütsür, ta pai ashi.

Ajidang masü Khamniungan nungertem telungjem, yimjung aser temeimtep tanüla nung iba benjong ya amunger, ta pai ashi.

Tsokum benjong amungba sülen ang alu aru tenzüker, aser iba benjong mamungdang alu aruba ajanga temoatsü malir ta züngshir, ta Heme-isa ashi.

Iba benjong nung nüburtemi chiyongtsü, shi-ango aser yi amala kinunger, tembar aser ainer den lemsateper, ta pai ashi.

Iba benjong nung lokti chiyongba mapang alir, kong taka-taiter aser maka-maiter ajanga temeimtep aser kati ka atema bilemstsüba sayur, ta Heme-i ashi.

Iba sentong nung tetsü-tebou ken ka Khamniungan Cultural Club, Noklak Town ajanga aten.

Khamniungan Tribal Council tir, M. Thangou-i tarur pela agizüba o jembia liasü. Iba sentong nung Executive Chairman KTC, Pakhiu menden liasü. Iba benjongmung sentong ya Khamniungan Tribal Council ajanga ayongzüker, kong District Administration, Commandant 45 Assam Rifles, department balala indang HOD tem, civil society, arogo aser tintet rogotem dena liasü.

## Kohima nung 'traffic advisory' agütsüba athier

**Dimapur, Mongputeni/Oct. 06 (TYO):** India indang tatong tiri Kohima semdangtsü aliba ajanga October 7 nungi October 9, 2021 tashi atema metetdaksü.

## DMLT Course agütsü atema shimteta tenüngtem sangdongogo

**Dimapur, Mongputeni/Oct. 06 (TYO):** PMTI, Kohima Neikhrielie Khimiao ajanga sangdong ka nung nung session 2021-2022 metetdaksü.

Item list ya Department asoshi Selected Candidates indang website (Merit wise) aser Waiting List (Merit wise) tenüngtem download sütettsü aser PMTI sangdongogo, ta Principal Office Notice Board nunga Director H&FW, Dr. angutsü, ta sangdong ajanga ashi.

## Security Forces temi Niki Sumi telok nungi züngsem ka apu



**Dimapur, Mongputeni/Oct. 06 (TYO):** Security Forces Sumi telok nungi züngsem ka apu aser pa ket nungi 9mm pistol ka den magazine, 9mm pistol indang injang trok, mobile phone ka aser sen 10,500 nguteta liasü. Iba ken o maneni bushisündangtsü atema pua pua liasü, ta sangdong ka ajanga ashi.

Osang tejangja ka aruba nung ajemdaker Security Forces temi State Police den lungjemer

operation ka agiba mapang Niki Sumi telok nungi züngsem ka apu aser pa ket nungi 9mm pistol ka den magazine, 9mm pistol indang injang trok, mobile phone ka aser sen 10,500 nguteta liasü. Iba ken o maneni bushisündangtsü atema pua pua liasü, ta sangdong ka ajanga ashi.

## Tesayurtem atema Online Certification Program ka yanglua lir

**Dimapur, Mongputeni/Oct. 06 (TYO):** Director, School Education ajanga sangdong ka nung ashiba agi, school nung 'School COVID Response Water Sanitation and Hygiene (WASH) aser COVID Responsiveness for Safe School Reopening atema tesayurtem asoshi Online Certification Program ka aliba 'ACTIVITY REPORT' Tab nung tenüng zülüokdaksütsü totuyuba ajanga yanglua lir.

Iba course ya English oshi nung 10 PPT modules ama agütsütsü, koba State Education Department website nung upload asütsü, ta ashi.

Iba course nung shilem agiba tesayurtemi hopta ka tsüngta 'self-earning format' nung modules ya azüngtsüla. Iba sülen online test agütsü aser takok angur nem digital certificate agütsütsü. Candidate kati anaben agütsütetsü, ta sangdong ajanga ashi.

Sangdong ajanga ashiba agi, iba dak sendakba nung Govt. Primary, Middle, High aser

Tanur 100 tekübok aliba Govt. Primary School tem nungi tesayur ka-ka dang yoktsü.

Iba sentong nung shilem agütsü atema Govt. School ajaki temalen shia aliba ama tesayur nungloksütsüla aser School Heads temi achayangtsüla, ta sangdong ajangasa ashi.

Jangra aliba Private School tem nungia iba sentong atema tesayur ana yoktsü akok. Ajisüaka Private School nungi shilem agirtem atema course fee ama tesayur shia sen 200 agütsü.

# Mizoram sorkari COVID tenüng amer sen bushir: Congress



**Aizawl, October 6, 2021 (Agencies):** Mizo National Front (MNF) sorkari COVID-19 maparen inyakba nung tamakok nguogo ta Mizoram nung Opposition Congress-i aitsür.

"Chief minister Zoramthanga-i aniba MNF sorkari state nung COVID-19 menatepa aoba mazüokteter" ta Congress lennir tejen Zodintluanga Ralte-i ashi.

State sorkari Covid wara tenüng amer sen angutsü lenmang bushi ta paisa ashi.

Mizoram nung Covid-19 wara mazüokteter ya Health Minister Dr R Lalthangliana aser Health & Family Welfare board vice chairman Dr ZR Thiamsanga na ajanga lir. Thiamsanga ya COVID-19 indang medical operational team nunga chairman lir, ta Ralte-i tai tongloksü.

"Health minister aser

medical operational team chairman nati mapa shitak meinyakba ajanga nisung 300 tema taküm samaba aser aika taküm libalirotsü nung timtem ajuruba atema sasaa bilemer" ta paisa metetdaksü.

India kübok tanga state tem nungbo Covid-19 tensa azüoktetogo aser iba ya samples test mapa tulu inyakba, health infrastructure ajungketba aser nübo bendenlokba ajanga liasü.

Mizoram state sorkari health infrastructure meyanglushi aser küm ana tsüngda Zoram Medical College (ZMC) nung ka yangluba dak alaka RT-PCR laboratory meyanglu, ta Ralte-isa ashi.

RT-PCR facilities mesüi Rapid Antigent Test kits amshiba ajanga Mizoram nung Covid-19 kanga puteter, ta paisa shisem.

Mizoram kübok district ajak

nung Covid-19 designated hospital yanglutsüla aser sensaker nem Covid-19 teyari agütsütsüla, ta Congress-isa takhangba agütsü.

Mizoram nung RT-PCR laboratory ka dang lir aser ibaji Aizawl anasa Zoram Medical College (ZMC) nung lir.

State sorkari district ajak nung RT-PCR laboratory tem lapoktsü, ta Health Minister R Lalthangliana-i sangoktsüogo.

District hospital ajak nung mini-RT-PCR mesüra TrueNat facilities lapokogo ta paisa shisem.

"Rapid Antigen Test ya tongtipang lir kechiyong iba ajanga virus puteter" ta State nodal officer & COVID-19 official spokesperson, Dr Pachauu Lalmalsawma-i ashi.

"Rapid Antigen Test mamshi asünungbo Covid-19 puteter aika taküm samar lila" ta paisa metetdaksü.

# Mizoram nung kinungboi kinungtsü pokset



**Aizawl kübok Chanmari nung aonsotsü ayokdak bomb apokba sülen agiba noksa angur.**

**Aizawl, October 6, 2021 (Agencies):** Mizoram kübok Lunglei district nung arishi küm 61 tain tetsür tain ka la kinungboi bomb agi pokset.

Mongulbar anüngdang 12:30 ako meta Chanmari nung aonsotsü ayoker Lalthianghlimi-i High Powered Committee (HPC) office

anasa aonsotsü yoka mena lia iba lendongji atalok.

Lalthianghlimi indang tesüiba kinungbo Rohmingliana (62)-i la indang stall nung moko ka chia amen. Iba mapang pai la dak azüit aser idangji bomb ji ajungbena apok, ta police-i ashi.

Idangjisa Lalthianghlimi asü

saka la kinungbo Rohmingliana kanga mejungi yirur Lunglei civil hospital-i anir ao saka idakji pa asü.

Apuanina tsüngda ken o ka adokba sülen ita ana shi tena balar liyonga aru. Lalthianghlimi ya lar jala tantsüla'er kidang liasü. Iba atema police-i maneni bushisüngdang südar.

# Meghalaya nung political party tasen ka tenteter

**Shillong, October 6, 2021 (Agencies):** Meghalaya nung Nongkrem constituency nungi taoba MLA Ardent Miller Basaiawmoit aser "group of concerned citizens" ajanga political party tasen ka tentetsü.

Meghalaya nung political party dang "Voice of the People Party (VPP)" ta ajatsü aser 2023 Assembly elections dak rangloker telok tasen tentet.

Mongulbarnü Ardent Miller Basaiawmoit-i Meghalaya nung political party tasen tentetba osang metetdaksü.

Voice of the People Party (VPP) ya taküm November ita nungang official süa tenzüksü aser iba sülen Election Commission of India (ECI) dang party symbol atema asüngdangtsü.

Ardent Miller Basaiawmoit ya taoba mapang Meghalaya nung Hill State People Democratic Party (HSPDP) president liasü.

"Tebilemtsü abenba sensotem ama onok mena mekazür aser tanü Meghalaya state nung ajurua aliba tensa meteta lir" ta Miller-i osangbener dang ashi.

"Maparen aser wadang ajak nung Meghalaya tesüleni alur aser iba atema temolung raksar" ta paisa ashi.

VPP indang tongtipang alizingji nübertem longjemtsüba aser külemi state asentenshitsü atema lir, ta Miller-isa metetdaksü.

Meghalaya Democratic Alliance (MDA) sorkar ajanga tamakok aika anguba nung ajemdaker onoki political party tasen tentetsü molungtet, ta paisa shisem.

"Temelenshi indang kanga jembir saka temelenshiji kong lir? Asenoki temelenshi chichiba angutsüla" ta Miller-isa metetdaksü.

"MDA sorkari junga ketdangsü masüba agi VPP tentet. Congress-ia temelenshi bener marutetsü" ta paisa ashi.

# Guwahati nung model Rajkanya Baruah tanaben apu

**Guwahati, October 6, 2021 (Agencies):** Guwahati nung aliba GNRC Hospital nung Dispur Police-i model Rajkanya Baruah puogo.

Gauhati Medical College and Hospital (GMCH) nungi doctor 6-i la temang nung timtem tulu kecha majitetba sülen apu. Rajkanya ya GNRC indang Semi-ICU nung anepalutsü anioka liasü.

Rajkanya Baruah indang temang nung shirang tulu kecha maliasü ta medical report nung shia lir.

Dispur police telok kati iba report ji bener GNRC-i ao.

Iba medical report ajanga GNRC ketdangsürtem nema bushisüngdang asütsü akok. Külen, GNRC Hospital nung nisungtem timtem balala meliaka ICU nung anioktsü atema anepalutur ta tai tongloksür.

October 1 anong Guwahati

kübok Rukmini Gaon tesem nung model Rajkanya Baruah-i aniba gari ajanga PWD workers 9 dak atsük.

Iba lendong nung yirur kabo tetsüng anaprong raksaogo.

Iba lendong atalokba sülen Dispur Police-i la apu saka anogo ka tsüngda la bail nung chiokeba atema nisungtemi social media nung Assam Police aitsü.

Assam Police aitsüba sülen police ketdangsür ana- sub-inspector Sahir Ali aser tetsür sub-inspector Abharani Gogoi na mapa nugi anenja liasü.

Rajkanya Baruah-i traffic rules alema inyakaka bail nung chiokeba atema Assam chief minister-i police ketdangsür ana anema bushisüngdang asütsü tetuyuba agütsüogo.

Honibarnü Rajkanya-i PWD aayangertem dak atsükba mapang la yi agi leta jemer liasü. Ajisiuka, Deobarnü la bail nung chioke.

# BJP president JP Nadda-i Manipur semdangtsü

**Imphal, October 6, 2021 (Agencies):** Bharatiya Janata Party (BJP) national president JP Nadda-i October 9 aser 10 anogotem Manipur semdangtsü.

Iba mapang pai Manipur nung assembly election agitsü aliba atema mapa inyakbatem meyipa repringshitsü.

Manipur chief minister N. Biren Singh-ia BJP state unit president Sharda Devi aser state party ketdangsürtem den Nadda-i Manipur semdangtsü

aliba atema senden menogo.

Nadda-i Manipur semdangba ya kanga tongtipang kechiyong sangküm küm tetenzüklen assembly election agitsü lir.

Züngsem 60 agi akümba Manipur Legislative Assembly nung tang BJP MLA 24 lir.

Taoba assembly election nung Congress sülen BJP-i menden teimba nung takok nguteta liasü aser taruba election nung parnoki menden 40 nung tenük yoker.

# Dibrugarh nung IPL betting atema nisung 2 apu

**Dibrugarh, October 6, 2021 (Agencies):** Assam nung Dibrugarh district nungi nisung anati Indian Premier League (IPL) 2021 season nung betting asüba atema puogo.

Tenaji Graham Bazar nungi Shakti Singh (27) aser Amolapatty nungi Sahid Khan (39) na lir ta jangjaogo.

IPL asayattem nung tenati online betting nung shilem agiba

putet.

Dibrugarh police-i Assam Game and Betting Act kübok tena anema ken o ka benokogo.

"Police-i tena dang asüngdangya asüadang online betting nung shilem agir kar tenüng metetogo" ta Dibrugarh SP, Shwetank Mishra-i ashi.

Iba nung shilem agirtem ajak police-i merenshitsü, ta paisa ashi.

**GOVERNMENT OF NAGALAND**  
**DIRECTORATE OF HEALTH & FAMILY WELFARE**  
**NAGALAND: KOHIMA**

**No. DHFW-5/TRG/PMTI/2019/6447-48** **Dated, Kohima the, 6th Oct, 2021.**

**NOTIFICATION**

In Pursuance of this Directorate Advertisement No. DHFW-5/TRG/PMTI/2019/4835-38 Dated, Kohima the 13th August 2021, the list of Selected Candidates (Merit wise) and Waiting List (Merit wise) for undergoing DMLT Course at PMTI, Kohima for the session 2021-2022 can be downloaded from the Department's Website [nagahealth.nagaland.gov.in](http://nagahealth.nagaland.gov.in) and PMTI Office Notice Board.

SD/-  
**(DR. NEIKHRIELIE KHIMIAO)**  
**Principal Director**  
**Directorate of Health & Family Welfare**  
**Nagaland, Kohima.**

**Issued by DIPR**



## TIR YIMYIM YIMOBILEM (EDITORIAL)

DIMAPUR YANGTEPNÜ, MONGPUTENI (OCTOBER) 07, 2021

### Taküm küm Christmas sempet

**T**süngremi mulungba ka süra, taküm 2021 küm yabo Naga nunger asoshi Christmas sempet tulutiba aser tajungtiba anguba küm ka asütsü amai yongyaa atar. Iba Christmas sempetji Naga yimten tebilemtsü tatem kati arua latetba takok aser temoatsü asütsü imlar. Joko, Naga nunger yimten nüchiso bushir telok, talisa NSCN teloktem India government den yimjung nung Naga yimten tebilemtsü ken o ya tembanga telemtetba kati arutsü tejangraba nung yimten ken o jembitenzüker küm 20 dak tali süir. Kasa yimten ken o latettsü atema küm metsü dak tali jembibaji talangka, pi Karbi nungerbo nübertem asoshi yimten temeten atema raratsü atema telok tentetter küm 20 majungdangyongi India government den telemtetba kati aruba asenoki tawa nguogo. Atangji, Naga nunger yimten nüchiso asoshi raraba otsüji tanga yimten temeten asoshi raraba otsü den kenyongi medemdangtsü makok. Naga nunger rara yabo Naga nunger ya India nunger masü, anungji India kübok malitsü ta Naga yimten nüchiso jenjang ka atema küm 100 junga rara aruba otsü lir. Iba jagiang, India government-ia Naga nunger yimten nüchiso asoshi raraba otsü yabo tangar dang nungi balaka ta angatetogo, anungji Naga yimten tebilemtsü akoktsü asoshia telatetba balaka nungdaktsü, iba jagi mapang agir. Atangji, tanüa India telongjem küboksa süaka Nagaland nung alir Naga nungertembo yimten aser sobaliba jenjang tangar India nunger dang nungi kenyongi balaka temaba nung yuja lir. Ajisüaka, aji agi meperir, kechiyong Naga nunger taginübaji, Nagaland nung alir Naga nungertem dang masü saka Assam, Arunachal Pradesh aser Manipur nunger alir Naga nungertem dena India kübok India nunger ama masü saka Naga nungerji Naga nunger ama yimten aser sobaliba jenjang balaka nung linür. Ano, Naga nunger temeten aser taginübaji aji dang masü saka alima balala süaka, Myanmar (Burma) nung aliba Naga nungertem asoshia khuret tulu lir, kechiyong Naga yimten nüchiso atema raraba mechi Myanmar nung alir Naga nungertema külen pei nisung aser külen Myanmar sepaitem ta tiyongsü nung reshikangshi, takoksa aser timtem jenti ajuruogo. Atangji, asenoki aginüba yimten nükjidong ajakbo metongtetsüa akok saka alimai tang aser teti Naga kin metettsüa Naga nunger ajak asoshi jenjang balaka ka latettetra, iba jagi Naga nunger inti temulung asütsü amai bilemer. Mapang matongdangyongi asenok tekolok aser temulungjang renema atatsüba kaji, Naga nunger India telongjem kübok malitsüa yimten nüchisobo mangutsüa akok aser India küboksa süaka Naga nunger ajak yimten ka kübok alitsüa Naga nunger lushitema melongjemtetsüa akok. Ajisüaka, Naga nungerji kin ka chir ama telongjem meraksai alitsüa sobaliba aser loktiliba sabang kabosa nungdaktsü. Iba sabangji ka kümtetra, shitakba Naga limajibo aji dang asütsü. Aji oda, tang Naga yimten nüchiso bushir teloktem ajak kenbang obang ka ser iba sabangji mesemtettsüla. Idakji Naga nunger ajak ajuruteptsü. Atangji, kodang Naga yimten telemtetba tasen ka agidir, iba jagi Naga nunger Assam, Arunachal aser Manipur nung alirtema tangar dang nungi jenjang tajungba ka nung alitsüa maangka ka bener arutsütsü aser Myanmar nung aliba Naga nungertema tangar Myanmar nungertem dang nungibo jenjang tajungba aser tesademba ka nung alitsüa India- i Myanmar yimten den jembitsü imlar. Kenpiga NSCN-IM o India government na tsüngda ken o süoka mejembitet arur, tan hopta nungi parnok ajurutepe Naga yimten ken o jembishitsü sentong lir. Ano, kasa mapang nung, tanga Naga yimten teloktema ajurua jembitettsüa parnok ajak tang Delhi nung mongdagi. Atangji, Naga yimten tebilemtsü dak aketba ken o bo R.N.Ravi aliba mapang telok ajak den jembimadokogo ta asenoki meteta lir. Tangbo, joko item ken o temji khen meyipa repringshir tatem kati arutsüba dang anendaka lir. Aji oda, taküm Christmas-bo Naga lima tasen ka nung pelatepa amongtsüa sarasadema atadi.

## OLEMSABANG

### Yashi, Tanü aser Asüng Ao oshi jenjang

~ Rev. C. Walu Walling (www.nokinketer.com)

#### Okila

Alima nung kin ka aliba temaitsü aser kuli tulutibaji oshi ya lir. Kin ka asoshi oshi ya nisung o nisung na tsüngda angatetteptsü kija atema dang masü, saka ibai par kin sobaliba aser lipok tamentakdak kimungji lir. Oshiji kin ka maitsü ayak, kobai pei kin meraket aser shisangrenji alima dang sayur. Ao kin kenozülüji missionarytem senmang ta ashitsü akok.

Shirnok dang 'indigenous people' ta ajar? Parnokji shir aser non-indigenous people-ji shirnok? Indigenous people jagi kechi oshi jembir, aser non-indigenous people pur jagibo kechi oshi ang jembir? Ao kinji indigenous asü non-indigenous, itemji lanua sensortemi taroki ia bushitsü wadang ka yutsüdi. 1982 nungi tang tashi UN-i Lurui 9 ya Lisopur anogo ta sangdonger amunger süra Lisopur aser Lisopur masür tetsüngdaji kechi, tajangzük aser takoksajia kechisa.

Indigenous tetezü asenoki koma rateter? First peoples, Aboriginal peoples or Native peoples, ...[https://en.wikipedia.org/wiki/Indigenous\\_people](https://en.wikipedia.org/wiki/Indigenous_people). "from to born in a specific place, Originating or occurring naturally in a place, native" (Latin indigena a native). Asen oshi nung yamai ashitsü akok: Mezüngpurtem Lipuyimpurtem, Yimkümeritem, ali kiburtem mesüra Lisor/Lisopur/Yimsoyimlir ta item rongnungji tapetba tenüng jar, tenüng dak jaloka nüburtem asoshi mapa inyaksü tenüngdaktsü.

Tanabuba nung, shirnok dang non-Indigenous ta ajar ta süra parnokji tesü arurtem, ali aser kimunglumong makartem, yimmakertem, tashiyim amshirtem, jenlokpongloker ta yamalaji ajatsü akok. Akodong amungi aruba ama. Yagi süngdong tulu Laküp-Ari aser yamala süngdong tulu nung mezüngbo nükdong tilaka nung arua atemtsü, saka tanem tanemi süngdong tulubato tarakzü majung amokbanger ali temo ajakji mesepa oda oda süngdongji alenseta südaktsür iba manungji süngkhu tulu küma ainer, aji oda mezüngpurtemto tanem tanemi pei ki nungi aenshia aotsüa kümdakja pei yim, pei temeten ajak okshia samaba den külemi par oshia samatsüa kümadaktsüba telok dangji "Non-Indigenous" ta ajatsü asü?

1993 küm to United Nation-i Year of Indigenous Peoples ta sangdongba sülen ano 1994 - 2004 United Nation Decade of the World Indigenous Peoples ta sangdonger item nisungtem atema terenlok mapatem inyaka arudagi. Ao kinbo iba dang nungi tera tekaraba nungi tenzüka Decadeana dak alia Ao oshi mangatettep nung jajayonga aruogo. Item mapang indang bilemtetdangbo, Ao oshi koloni aor? Ao oshi samadisü na? Aor Aotsüri Ao oshi meima jembia zülutetdi ma ta shisabulu khuret bener Tsüngrem dang sarasadema aruogo. Ao oshi item ajak ajanga jajayonga arudang Tsüngrem teyari bilemteter, aser tanüa Tsüngrem teyaritem atema tenüng asanger.

#### Ao Oshi Yashi, Tanü aser Asüng Jenjang:

Ao oshi jenjang asadangtsü mapang meshiogo ta bilema lia, iba sentong mapang den peta ayongzükogo ta tayonger Tir Yimyim dang pelar. Lisopur Oshi indangji toktsür Ao oshi jajayonga aruba den tarutsü nükla indang aroka lemteptsü ya mapang tajung. Onük nungji Ao oshi jenjang asem lemsar bilemdangtsü agütsüogo. Ao oshi jenjang asemji tongmelang agi yamai lemsadi:

#### Mezüngbuba nung Yashi Ao Oshi jenjang:

1876 - 1954 (küm 82) iba dangji asenoki yashi ta ajatsü akok. Yashi Ao oshi indang repringdangra, Ao oshiji kibong tajung ka nung asoba tobur tajung aiür, temulung tesadem, ajak den kasa jaklatetba, tereprangnüsüa anükalem yimya aketba ama liasü. Yimer dang masü oli-ora pi bendang ter-i la nükshia repringba ama, küm 82 ji Lotha, Sema, aser Tzüla Ayong ajanger alir kin aikati Ao oshi angazüka jembia aser züluyu balala rizünga ayuba putu liasü.

Kenozülü aser iba wadang nung ABAM-i tongti shilem agia aruba mapang. Ao sünak abener ajak teka amteper jangyumedema aru. Iba mapang pi kini Ao oshi meteta jembibaji par nisungtemi "Hait! yabo tesüngmangtsü ato" ta nükshitepba liasü. Yashi Ao oshi nungji tashishitep kecha makai, ibai ang shitak, ajibo tai, X,Y,Z,Ü- i aibelena züluba atema sen achi/ aka chi; yabo ozü oshi, ajibo par oshi, ibai ang agitsü, ajibo magitsü ta jembiba kecha züluyu nung munguka mesüra mangashika.

Iba tensa nungji Ao oshi agi Ao oshi jembir ajak arakmoka anir arudang, tamangba yimsü aser libaliru nung temelenshi aika bener arutsü. Khristan yimsü amanger aser akhi tsürabur yimsü amanger tsüngda mangatettep adokba tesem tesem nung alitsü, saka Ao oshi renlokba nung iba jagi kenü danga timtem magütsü. Talisa ibai tashi tait Ao Komiti ka shimer aruba ajanga takok ngua aruogo ta 1924 Ao Mungdang Lemtet nungjagi angateter. Yashi Ao oshi nung maitsü lungzüngji 1911 Ao Naga Dictionary Dr. E.W. Clark-i adoktsübaji liasü.

Dr. E.W. Clark Ao Naga Dictionary atema olen kar lemsatepnür:

Ao kin asoshi misionarytem senmang tulutiba kaji Ao-Naga Dictionary ya asütsü. Saka iba Dictionary ya school nung amshiba aser iba tetuyuba kübok Ao o zülumen azüoka anir aruba indang tesüiba mapang züluyu kecha balakabo munguka. Ibai adoker Clark aser tebuttsü na küm ishika danga asenok den lia, iba nungi tesayuba kar danga agütsü asübo, pai timtem ajuruba aser Ao oshi nung olasü mebendangteti jembia zülubattem ya terabo junga lateta yur lila ta sasasetta bilemer.

Yashi Ao oshiji kanga tenükshitsü ka. Oshi ajanga kin ka lungjemdaktsür ta oshi nung mongintemi jembiba aser zülubaji shitak ta kinük aika nungi kuli sayutetogo. Yashi Ao oshiji Ao oshi meimer ajaki kanga ketasena, meima aser iba oshi ajanga yim o yim na, temba tinu, kidanger den telungjem aser yimjung yanglua ajak den merang apu ama tesendaktep tajung nung aru. Ano olen ka nung ibai Yisu yimsü Osangtajung ajanga bener arutsüogo. Kechiaser Yisu yimsü Osangtajungji amming ain ajak ateta or ajak sangwadaktsüba Tsüngremer ainji liasü.

Alima nung oshi ajak putu aser tensa mapang den apet tajungba melenshiyonga aruba den atongsema Ao oshia jajayonga aruogo. Tanü Ao oshi kechi jenjang nung noktaka lir, aji yashi Ao oshi ajanga yanglua yutsüba oshi kimung tamentakdakji lir. Iba kimung majangi tanü Ao oshi mera tasen agia apumesotsü tamakoktsü asütsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Pastor ka chioktsü akhangba petition ka nung nisung 2070-i sign asü



Cuba nung Pastor, Lorenzo Rosales Fajardo aser pa kinüngtsü Maridilegnis Carballo na noksa nung angur.

**October 06, 2021:** Taküm July ita nung Cuba linük nung longkak aitba mapang nung Protestant pastor ka pua liasü saka pa anema ken o mangadangi tang tashi mechoker.

Pastor chioktsü takhangba agütsüba petition ka tenzükba sülen iba petition nungji sign asür 2000 dak tema jungogo.

UK nung amenoka aliba Khristan telok- Christian Solidarity Worldwide (CSW)-i signature campaign ji tenzükba liasü aser sign 2,070 keta aliba petition ji Cuba Ambassador, Bárbara Montalvo Álvarez nem agütsüogo.

London nung aliba Cuban embassy nung agütsüba petition ajanga Pastor Rosales Fajardo chiokang ta takhangba agütsür.

Pastor apuba sülen ita ana dak tema jungogo saka pa anema ken o tang tashi mangadanger. Coronavirus wara mapang nung mozü aser chiyungtsü agi anünga atema nübürtemi Communist sorkar anema longkak sashia aita liasü.

Palma Soriano nung State Security officers-i pastor Fajardo apu iba sülen August ita nung Santiago de Cuba nung aliba Boniato Maximum Security Prison-i anir ao.

Longkak ait tenzükba sülen Cuba Tir, Díaz-Canel-i sorkar pusemertem dang longkak aiterem aputsü tuyua liasü.

Paisa, tang linük nung timtem adoka aliba ya US ajanga lir, ta aitsü.

Pastor Fajardo ya Monte de Sion Arogo nung küm 20 tashi pastor inyaka arur aser pai loktiliba nung timtem agütsüba atema pa küm 3 nungi küm 20 tashi tepuokdak ayutsü, ta ketdangsertemi metetdaksü.

"CSW-i maneni Pastor Lorenzo Rosales Fajardo'er kibong nungiter. Kinüngbu ka aser tebuti ka kidangi meyipa arutsü atema par kibongi pa atadar," ta CSW advocacy tongti, Anna-Lee Stangl-i metetdaksü.

"Iba petition ajanga alimai parnok repranga atadar aser parnoki Pastor Rosales Fajardo dak tim mesüi benshibaji alimai meteta lir, ta Cuba ketdangsertemi metettsü," ta lai ashi.

Jail ketdangsertemi pastor semdangtsü atema pa kinüngtsü, Maridilegnis Carballo nem-a temelaba magütsür. Pai minute 3 shi dang par kibong den jembiteter, ta CSW-i metetdaksü.

Ketdangsertem par jabaso, Carballo-a pua liasü saka pabo chiokogo.

"Lai international human rights organizations den la kinüngbu timtem lemsatepba ajanga ketdangsertemi la amokmerener," ta CSW-i metetdaksü.

Tamalena linük nung Communist sorkari Fajardo anema inyaka liasü. 2012 küm nunga sorkari par Arogo kiojen pua liasü.

"Tesünep nung longkak aitba sentong nung shilem agiba atema pastor apuba sülen ita ana dak tali tepuokdak lir," ta CSW campaigns tongti, Dave Mance-i metetdaksü.

Pew-Templeton Global Religious Futures Project ajanga ashiba agi, Cuba nung nütüung shilem 59 bo Khristan lir ajisüaka sorkari mapang shia Khristantem dak tenük yoker.

1992 küm Cuba sorkari linük temzüng yanglushia Cuba ya Tsüngrem dak mamangba linük ka masü saka secular linük asütsü, ta sangdonga liasü. Iba mapang nungjagi tenzükba linük nung Khristan nütüung timba-timba akümer.

Ajisüaka tang tashi Communist sorkari Khristantem anema inyaker. 2019 küm nunga Cuba linüki linük temzüng yanglushiba mapang nung Cuba ya secular linük ka asütsü ta sangdong.

1959 küm Fidel Castro-i US-i pusemba Fulgencio Batista sorkar atsüngdokba sülen nungi tenzükba iba linük ya Communist Party of Cuba-i yimsüsür.

2008 küm Castro'er adianu, Raul Castro Tir shim, iba sülen 2019 küm Miguel Díaz-Canel Tir shima liasü.

## Myanmar nung sepaitemi Chin nung Khristan ana khaset

**October 06, 2021:** Myanmar kübok Chin state nung jenshia aliba yimdaklitem kümzüksü atema Khristan ana Thantlang jilai aruba mapang nung Burmese Army (Tatmadaw)-i tenaprong gari nung lia khaset, ta International Christian Concern (ICC)-i metetdaksü.

September 18 nü Myanmar sepaitemi amakba mapang nung jila nungjagi nisung 15,000 shi jenshia liasü aser iba mapang nungji Khristan ana- arrshi küm 70, Pu Ral Tu aser Pu Hram Cung (70) nata Hakha-i jena liasü.

Jenshia aliba yimdaklitem

yaritsü atema September 29 nü senden ka mena tembangba sülen tangar nisung pezü den tena van gari ka nung Thantlang-i aoba mapang nung sepaitemi amak. Iba mapang nungji tena khaset aser tanünga nisung pezü rongnung ka tekolak yiru aser ka teberem yirua liasü.

Ral Tu ya judge ka liasü aser Arogo aika nunga pastor inyaka aruba sülen Thantlang jila nung yimtsü-yimbo ka liasü. Tasüngnü Thantlang nung tena den asüpila sentong agiba sülen tasümgang rema yutsüogo.

Tang Thantlang nung nisung ishika dang anünga lir, aser

yangji alir kati, "Onok ajak amokmeren tia nung lir. Onok-a Hakha-i jena aotsü. Joko kü kinüngtsü küna Thantlang nung ozü kidang melitettsü," ta metetdaksü.

Joko tesüiba ita ishika Thantlang nung sepaitem aser local telok balala tsüngda rarar aser ibaji ajanga nisung meyrjang aika jenshiogo.

Chin state nung Khristan nütüung aika lir, aser taküm February ita nungi sepaitemi Myanmar yimsüsüba tenzükba sülen Chin state ya sepai yimsüsüba anema nokdakba tongti tesem ka lir.

## ANOGO ABEN TSÜNGREM DEN

### Ni langka angazüktsüla

*Maka mait indang ni jembir masü,  
kechiaser kechi tia nungsa ni lidir, iba  
nungji temulung chia alitsü ni angazükogo.  
Filipi 4:11*

Temulung achibaji langka yimya nungi aruba masü saka ibai angazüktsüla. Paul taküm nung teperi kaa aliba mapang liasü. Aikati ashir parnok teperi kaa lira temulung asütsü. Saka nai tekong 12ji zünga Paula maka-mait, machi-majem tia nunga liasü ta angur. Kodang pa Filipi tepuokdak liasü, pai mulung masü jembi asü? Pai Tsüngrem tenüng sanga ken dena liasü (T.M. 16:25). Iba dangji temulung asüba ta ajatsü akok.

Na kechi maka iba nung ranglokba dang temulung asüba ta majar. Na makaba nai aginüra iba dangji temulung asüba ta majar. Na temulung süa mali. Saka shidakba temulung asübaji na kechi aka iba nung ranglokbaji lir. Na chiyongtsü aser aben süoshi kar asü? Aji lira temulung süa liang (1 Timothy 6:8). Alima nisung aika ibajia maka lir. Na Laishiba kar asü aser nai kong külemner idakji külemtsü nüji kar asü? Aika iba ama inyaksü nüji maka lir. Na chiyongtsü, aben-süoshi kara, aser nai mulung dak külemtsü nüji kara, na Tsüngremi kanga moatsügo. Khristan ka ama na kotak nung teti tatem maka mapang indoktsü. Ibai teti tatem maka temoatsüji lir. Item temoatsütem yur, na kechi maka iba nung rangloktsü kecha kuli mali. Na Paul ama alitsü akok aser temulung süa alitsü angazükang.

Oba, tanü ni makabatem nung merangloktsü, saka ni akaba temoatsütem nung rangloktsü kü dang yariang. Amen.

## Uttar Pradesh nung anti conversion ozüng kübok pastor ka apu

**October 06, 2021:** September 25, 2021 nü Uttar Pradesh nung anti-conversion ozüng kübok police-i Pastor Shyam Sunder apu aser September 26 nü pa anema ken o benok, ta International Christian Concern osang ajanga metetdaksü.

Osang angazükba agi, September 25 nü Etawah district kübok Lakhna yimdak Pastor Sunder leniba nung tekülem sentong agiba mapang nung police-i pa apu. Anüngdang 11:30 ako meta tekülem sentong tagidak mapang nung police pezü arua pa apu.

Pastor Sunder'er kinügeritemi ashiba agi, Pastor Sunder ghonda 24 shi police station nung aliba mapang nung police pa dak kanga azük aser police station nung pa nem chiyungtsü kecha magütsü liasü.

Police station nung Pastor Sunder dang asüngdangyaba mapang nung police pezü par

kidangi yoka pa anema kuli bushia liasü. Par kidang nungi police-i Laishiba aser ken kakat aika bener aruba sülen pa anema kuli ama amshi.

Police-i par ki mita bushiba mapang nung Hindu yimsü alia amanger telok kati par ki longbanga liasü, ibayongji tetsübu nung par kibong züngsem ajak par yimdaki jena oadok.

Pastor Sunder-i Hindu nung mesüzüka Khristan yimsü dangi meyipdaksür, ta pa nem tai tonglokja Uttar Pradesh nung anti-conversion ozüng tasenba kübok pa anema ken o benok.

Taküm June ita nungi tenzükba state nung Khristantem anema inyakba aser Khristantem apuba kanga bulua ataloker. June ita nungi tenzükba tang tashi nung Uttar Pradesh nung Khristantem anema inyakba tatalokba 37 lir, ta International Christian Concern (ICC)-i metetdaksü.

**OLONG PAITEP # 5959**

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

<b>TIPIEN</b>		<b>LANGTSÜNGLEN</b>	
1. Yakob tetsü	- (6)	2. _ _ _ gki	- (3)
4. Mezüng nisung	- (4)	3. Telungpur telok ka	- (2)
6. Tasen lai kakat ka	- (5)	5. Tsüngremi mezüng	
9. Au lanu	- (2)	pokttdaktsüba	- (5)
12. Tejen lai 21 buba	- (11)	7. Tia	- (4)
15. Tekolak tembar	- (2)	8. Yakob-er jabaso ka	- (5)
16. Zütsüra anepsang	- (5)	10. Abraham tebutü	- (4)
17. Kain tenu	- (4)	11. Rebeka kinungpu	- (4)
18. Hana-er jabaso	- (6)	13. Esau tenu	- (5)
		14. Tzünglu tilala aru	- (4)
		16. Jafet tebu	- (3)
		17. Teka agi kongshi	- (2)

**OLONG PAITEP # 5958 TELANGZÜBA**

<b>TIPIEN :</b>		<b>LANGTSÜNGLEN :</b>	
2. Pongsen, 5. Lepko, 7. Omen,		1. Alimang, 2. Pongen, 3. Samaru,	
8. Maongka, 10. Yangkhu,		4. Nün, 6. Pio, 9. Nüngdak, 10. Yongya,	
12. Senpong, 14. Angu, 15. Raksa, 1		11. Kongro, 13. Ora, 14. Ata.	
6. Arameso,			



**ALOKBA LOCKDOWN NUNG TIMTEM MAREM KOPIRAZ JILO AYIR**

**Sobangba** : Hai temba...Ner mezüng Lockdown tenzük dangbo kanga timtema aliba sernung... Tawa tanü yabo kanga mola-moshia jangradema lia angur aja....??? Ya sen arulen 'Income' lenmang tajung kar bushitet asü koda...???

**Alokba** : Temba ni mela-mela sen aa-tsü tasa tajung ka nguogo...Saka tangar dangbo teshima no...??? Arasen-er Kopiraz jilo aitsü... Mojing aritoker...Teret raksaba yanglutsür jilo aitsü...Ni ya joko tangari phone asüba agi aonunga ayipjanga memejanger ato...

**Sobangba** : Temba...Saka shitakba Kopiraz-temi kechi koma inyaker... Iba amala 'Action' karbo ia inyaka sayunung dang amangtsü ashi...Tapi-tapi agibo sen magütsüsto ato....???

**Alokba** : Eeeeeesssh...Ibaji atema kecha shisa tebulu... Oda shiranger Room jagi yir nem-nema asadena teka ayipshia khen senzütsü...Aser oooff- oooff ta aposhija...mashi-mashi ka khen maliz sutsütsü...Aserbo Mojing tesashi kati jungjunga alener yua lir ta ashitsü. Anungji ni aji salatsüdi Sen Rs.5000/-, Rs.10,000/ , Rs.15,000/- agüjang ta meshitsü.

**Sobangba** : Temba...Saka mozü-mora karbo yanglua agütsünungdang ashi...Mamangtsü ato....???

**Alokba** : Eeeeeesssh...Oda sungjang-lijang tasentzü kar kechi-kechi meyoktepa yanglur 'Bottle' ka ana agütsütsü...Aser anugo nung asemben jemang ta shir toktsütsü aji teperi aja.  
- Lilir : L.Kika Pongener.

**TANÜBO NAI LANGZÜANG**

Q. "Lokapriya Gopinath Bordoloi Award for National Integration and National Contribution" ya koba stat-i agütsüris?  
[A] Maharashtra [B] Odisha [C] Assam [D] Tamil Nadu  
\_\_\_\_\_ (Taruba adok nung onoki langzüsü)  
**YASHI ADOK TELANGZÜBA :** Nata Sankirtana

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Langpet**  
(adv) aibelena alang (err in cutting)  
\* Takobai shijep agütsütsüba shi **alangpet**.

**Langra**  
(adj) kanga talang (too long)  
\* Covid agi **langra** mokdangba agi asenok akoksar.



**Happy Birthday**

**TENÜNG** : APIJEMLA AOCHIR AIER  
Tasoba : October 7  
Küm : 2  
Talidak : K. Kire Colony, Kuda C, Dimapur  
Na ajanga onoki Tsüngrem taochi tali angateter. Nü menürem jakten aser sempettem ajanga onok teti peladaktsür. Tulusang Tsüngremi na maneni moajangma. Happy 2nd Birthday  
- Oja, Oba aser na meimertem



**NAI-A YA METETTER MA**

- NETFLIX NUNG SAYUTSÜ ALIBA SHOW ASER MOVIE KAR: OCTOBER 2021**
- Adventure Beast - Netflix Series
  - Dynasty: Season 4
  - Roaring Twenties - Netflix Documentary
  - We Steal Secrets: The Story of WikiLeaks
  - King Arthur: Legend of the Sword
  - Hypnotic - Netflix Film
  - Nobody Sleeps in the Woods Tonight Part 2 - Netflix Film
  - Sintonia: Season 2 - Netflix Series
  - Wentworth: Season 8
  - Luis Miguel - The Series: Season 3 - Netflix Series
  - The Motive - Netflix Documentary
  - Army of Thieves - Netflix Film
  - Mythomaniac: Season 2 - Netflix Series
  - Thomas & Friends: All Engines Go
  - The Time It Takes - Netflix Series

**SUDOKU # 6000 TELANGZUBA # 5999**

		6	9	2	3				4	8	9	6	1	2	7	3	5
		2		6	1	3	4	5	3	1	5	4	7	9	8	2	6
	1		4		5	2		6	2	6	7	5	8	3	4	1	9
	3						8		9	3	6	8	2	4	1	5	7
7	4		5	6					5	4	1	7	3	6	2	9	8
								9	7	2	8	9	5	1	6	4	3
	6		8		4		7	2	8	9	3	1	4	7	5	6	2
2	8	9	6		7	4		1	1	7	2	3	6	5	9	8	4
	7	4	2		9		6	8	6	5	4	2	9	8	3	7	1

**OJANG LUTEP # 5545**

ÜMOATETS :

INÜAGRA :

NGRETSÜM :

HITAS :

AATSÜNGLA :

SAER :

MYZIA :

LIRLIBAO :

AKAJ :

OKTAZÜSÜLA :

**OJANG LUTEP TELANGZÜBA # 5544**

KODAKA JEMBIA SENTONG ATONGTET YONGJIA TSÜNGREMER  
MOLUNGBA MESÜRA TEBILEMBA MATALOKTSÜ

**TAN HOPTA ATEMA - KOMA SÜLA ?**

Q. Nagaland nung yimtsüngtem kübok aliba ali kimongtem ya bank nung talang yutsür (mortgage) sen aputettsüsa ozüng tasen ka yanglu nunga koma süla ?

# Drone policy ajanga tezülen alirtem ajangzüksü: PM Modi



October 06, 2021 nü New Delhi nungi video conferencing ajanga Ato kilonser, Narendra Modi-i Madhya Pradesh nung SVAMITVA scheme ajanga tajangzük angurtem den jembiba noksa nung angur.

**New Delhi, Mongputeni/October 06 (Agencies):** Bodhbarnü Ato kilonser, Narendra Modi-i, linük nung drone policy tasenba ajanga kanga tezülen alirtem tajangzük angutsü, ta metetdaksü.

New Delhi nungi video conferencing ajanga Madhya Pradesh nung Svamitva scheme kübok tajangzük angurtem den jembiba mapang nung Modi-i, "Drone technology ajanga aluyimertem, shirangertem aser kanga tezülen aliba tesemtem nung alirtem tajangzük ngudaktsü atema tawa telemtetba aika agiogo," ta metetdaksü.

"India nung drones tajung aika yanglur, aser iba tsütsülen-a India-i tangar dak memetaloktsüla. Iba atema PLI scheme-a sangdongogo," ta pai ashi.

Drone policy tasenba ajanga India nung aliba yimtsüngtemi jenjang tasen alangzüksü, ta shia Modi-i, "PM Swamitva scheme ya yimtsüngtem nung aliba aianu aser adianutem atema tashi tuluka akümtsü," ta metetdaksü.

Coronavirus wara mapang nung yimdaklirtemi kanga meranga inyakba atema tenüsang agüja Ato kilonseri, "Corona mapang nung India nung yimdaklirtemi nükjidong ka

yur longjemer inyakba onoki metetogo; iba wara anema kanga yakyaka raraogo," ta ashi.

Iba sentong jakdang Modi-i Madhya Pradesh nung SVAMITVA scheme kübok nisung 1,71,000 nem e-property cards lema agüja liasü.

Iba sentong nung Madhya Pradesh Chief Minister, Shivraj Singh Chouhan-a aden.

SVAMITVA ya Ministry of Panchayati Raj kübok Central Sector Scheme ka lir aser iba scheme nükjidong ya yimtsüngtem nung alirtem nem ali aser kiojen temeden agütsü atema lir. Iba scheme kübok yimdaklirtemi loan atema kiojen amshitetsü.

# Tangbo India nungertain shilem 7-i dang vaccine agitsü arendaker

**New Delhi, October 06 (Agencies):** Tangbo India nung tain nütsüng shilem 7-i dang coronavirus vaccine agitsü arendaker, ta survey tasen ka ajanga bushitetogo.

Online community platform- LocalCircles-i iba survey ya agia liasü. District 301 nungi tebur shilem 67 aser tetsür shilem 33-i iba survey nung shilem agia telangzüba agütsü.

India nungertain nütsüng (arrshi küm 18 ser temapurtem) crore 94 shi lir aser tang tashi nung tain crore 68-i vaccine agiogo.

Iba survey nung shilem agir (vaccine magi alir) shilem 46-ibo tekaraba nung vaccine

agitsü tebilemba lir ta langzü, ta LocalCircles tentetsang, Sachin Taparia-i metetdaksü.

Ano shilem 27-ibo, tang aliba vaccines ajanga coronavirus variants balala nungi kümzüksü aser masüar memetet, anungji tang tashi nungbo vaccine agitsü tebilemba mali, ta langzü.

"India nung tain nütsüng shilem 7-i dang vaccine agitsü arendaker. Iba shilemji vaccine magir tain crore 26 den medemdangra tang tashi tain crore 7-i vaccine agitsü arendaker," ta Taparia-isa metetdaksü.

Vaccine agitsü arendakertertemi ashiba kulitem rongnung, temang nung

timtem adoktsü tsübuba, item vaccine kanga kera tendangba aser side-effects kulitem densema liasü.

Ano karibo azü telong akümtsü arendakba aser coronavirus wara süngjamba nung ajemdaker vaccine magitsü lemetetba densema lir, ta kasa survey ajanga metetdaksü.

Taküm January ita nung India nung coronavirus vaccine agütsü tenzükbapang nungbo tain nütsüng shilem 60-i vaccine agitsü arendaka liasü saka taküm April-May nung coronavirus wara tanaben sashia prokba mapang nungbo vaccine agitsü aikati melungteta liasü.



October 06, 2021 nü Lucknow airport nung Congress lenir, Rahul Gandhi, party lenir KC Venugopal, Punjab Chief Minister Charanjit Singh Channi aser Chhattisgarh Chief Minister Bhupesh Baghel nungertangokba noksa nung angur. Tawa Lakhimpur Kheri district nung asür kibongtem semdangtsü atema parnoki aru.

**DECLARATION**  
**(Correction of Daughter's Name and Father's Name)**

I, **Shri. Ruokuoneituo Whuorie**, son of **Late Kezetuolie Whuorie**, aged 35 years, present resident of Kitsubozou Colony, District - Kohima, Nagaland, do hereby solemnly affirm and declare on oath as follows:

- That I am a bonafide citizen of India hailing from the Angami Naga Tribe and a present resident of the above mentioned address.
- That whereas I have married **Smti. Imlikokla Jamir** on **17.07.2017** by way of Naga customs and rites and till date we are mutually living together as husband and wife.
- That from my wife first marriage she has one daughter namely, **Miss Yingla alias Kevisenuo Whuorie** born to my wife and her ex-husband **Shri. Chingling** on **17.11.2006**.
- That this affidavit is made to declare that in my daughter's academic records and in all her official documents, her name has been entered and recorded as **Yingla** and Father's Name has been entered and recorded as **Chingling**.
- That now in order to avoid any further complications regarding my relationship with my daughter by virtue of my marriage to her mother **Smti. Imlikokla Jamir**, I do hereby declare that my daughter shall be known and addressed as **Miss Kevisenuo Whuorie**, whereby relinquishing her former name i.e. **'Yingla'** and her father's name will be entered and recorded as **Ruokuoneituo Whuorie** whereby relinquishing her biological father's name as such there is No-Objection whatsoever from any quarters.
- That accordingly in case of my daughter's name being entered and recorded as **'Yingla'** or **'Kevisenuo Whuorie'**, it refers to one and the same person i.e. my daughter and is indistinguishable, interchangeable and synonymous.
- That this affidavit shall stand as a piece of evidence for any ratification/clarification if any complications that may arise with regard to Change/Correction or my daughter's name and her father's name in her academic records and/or any other official documents and henceforth she shall at all times hereafter in all record, deed and in writing and in all proceeding, dealings and transactions private as well as upon all occasions whatsoever use and sign her name as **Kevisenuo Whuorie, daughter of Ruokuoneituo Whuorie and Imlikokla Jamir** and I expressly authorise and request all persons at all times hereafter to designate and address my daughter, by such assumed name, surname accordingly.

That the above statements made in Para 1-7 are true to the best of my knowledge and nothing material has been concealed herein and I signed this affidavit before the Competent Authority on 01st September 2021 at Kohima.

**DEPONENT**

Solemnly sworn before me by the deponent above name on this the 01st September 2021.  
**Magistrate Notary Public**

# Modi aser Yogi sorkar ya British yimsüsüba den kasa: Yechury

**New Delhi, October 06 (Agencies):** Tawa Uttar Pradesh kübok Lakhimpur Kheri nung tatalokba dak sendakba nung Bodhbarnü Communist Party of India (Marxist) lenir aser taoba mapang Rajya Sabha MP, Sitaram Yechury-i, Centre nung Narendra Modi-i aniba sorkar aser Uttar Pradesh nung Yogi Adityanath-i aniba sorkar ya taoba mapang India nung British nungertain yimsüsüba den kasa medemdangtsü akok, ta aitsü.

Yechury-i, "Iba ama rara aser taochi maketba tatalokbatem ya British nungertain yimsüsüba mapang nung ang angu, aser tang Modi sorkar aser UP sorkaria kasa inyakker. Iba tatalokba ajanga Champaran nung British nungertain inyakba imdangi arua bilemteter. Iba sorkar yagi reshikangshir aser iba yimya ya anogo shia tamajungba akümer," ta ashi.

Tensa majungba nung ajemdaker UP sorkari Lakhimpur Kheri semdangtsü atema Congress lenir, Rahul Gandhi nem temelaba magütsüba dak sendakba nung Yechury-i, "India

nung senso mashie kati linük tesem mashie semdangtsü akok. Kechiba state sorkar kati, na ozü state telungi maittettsü? ta shiteter. Iba ya linük temzüng alema inyakba lir," ta ashi.

Paisa, Lakhimpur Kheri nung tatalokba atema tekaraba nung aibelener aputsüla aser tepuokdak ayutsüla, ta takhangba agütsü.

"FIR benokba tetezü bushisüngdang tenzükgoko ta mangatetsüla, bushisüngdang tenzüksüla aser aibelener aputsüla," ta CPM lenirisa ashi.

India nung aluyimertem union aikati tentetba- Samyukta Kisan Morcha (SKM)-ibo, aluyimertem longkak aitba sülen senshiba mapang nung Union minister of state for home affairs, Ajay Mishra Teni'er jabaso, Ashish Mishra Teni leniba nung gari asem nung nisung kar aruba sülen aluyimertem dak menüng, ta tai tongloktsüogo.

Parnokisa SKM lenir, Tajinder Singh Virk-a yirutsütsü meranga liasü. Ajisüaka Ashish Mishra-ibo, iba tatalokba tesem nungji pabo maliasü, ta shiogo.

# Madhya Pradesh nungbo diesel litre ka nung sen 100 jungogo

**Bhopal/Indore, October 06 (Agencies):** Madhya Pradesh kübok Indore aser Bhopal na nungbo diesel litre ka nung sen 100 dak tema jungogo; yimti ana nungjisa petrol litre ka nung sen 111 dak tema jungogo.

State yimtiba, Bhopal nung tang diesel litre ka nung sen 100.1 aser petrol litre ka nung sen 111.10 jungogo, ta Petrol Pump Dealers Association (PPDA) Tir, Ajay Singh-i metetdaksü.

Balaghat district nunga diesel litre ka nung sen 101 jungogo.

Petrol aser diesel jenjang atuba sülen tang Indore nung diesel litre ka nung sen 100.11 aser petrol litre ka nung sen 111.18 jungogo.

Tang mezüng Indore nung diesel litre ka nung sen 100 dak tema atur, ta Madhya Pradesh Federation of Petroleum Dealers Association tatong tir, Paras Jain-i metetdaksü.

1977 küm mapang ka nungbo Indore nung diesel litre ka nung sen 1.61 dang liasü.

PPDA Tir, Ajay Singh-i, state nung totzü jenjang majemtsü ta metetdaksü.

"Centre-i totzü litre shia nung saru telatet ka agütsür. Ajisüaka state sorkari shilem lemsar Value Added Tax (VAT) agir, anungji state nung totzü jenjang ajemtsüsa masü," ta Singh-i metetdaksü.

Tang tesüsa totzü jenjang atuba ya international market nung crude oil jenjang atuba ajanga lir, ta paisa metetdaksü.

Madhya Pradesh Congress Party otongdar, Anurodh Jain-ibo sorkar dang petrol aser diesel nung VAT saru tangsa ajemtsüla aser totzü saru ya Goods and Services Tax (GST) küboki aitdaksütsüla, ta takhangba agütsüogo.

## Xi künati Taiwan tezüngzüktep nung anidaktsü molung: Biden



**Washington, Mongputeni/Oct. 06 (Agencies):** Taipei aser Beijing tsüngta tensa tamajungba akumba mapang ka nung, US Tir Joe Biden-i China Tir Xi Jinping den Taiwan atema jembioigo aser "Taiwan agreement" nung anidaktsü molungtep, ta Mongulbarnü ashi.

"Ni Xi den Taiwan indang jembioigo. Künaprongi Taiwan agreement nung anidaktsü molung," ta pai ashi.

"Iba tezüngzüktep nung anidakba dak alaka pai danga kecha meinyaktsüla ta jangjajanga jembioigo."

Washington indang policy ka kübok Taipei masü Beijing ang 'recognize' süa lir aser Taiwan Relations Act nunga US-i tesendaktep ya Taiwan den masü Beijing den ang yanglutsü aser Taiwan tarutsü jenjang ya yimjung maparen ajanga ang jangjatetsü shia lir.

Iba act kübok United States yagi Taiwan nem par linük kumzüka ayuba nung yaritsü shia lir, aser China-i iba asetkong ya par meiyong aser yangji China ka dang lir aser Taiwan temeden mali, ta China-i nokdakba Washington-i angateta lir.

Biden-i jembiba ya United States nungi jangjashitsüsüla aser Taiwan tsütsü US sentong memelensi lir ta ashitsüla, US-i parnok atema tashi ajak agi bendanga agütsür inyaker aser defense tsütsü US-i maneni Taiwan yaritsüla ta shitetsüla, ta Taiwan indang Foreign Ministry ajanga ashi.

"China sorkar indang military, diplomatic aser rongsenketzüng timtem ajurudang Taiwan aser United States teti tesendaktep tajung liasü aser osangtsüsang agitepa aru," ta Taiwan-i ashi aser tang US-i jembiba ajanga China inyaksangshi indang süoki

ia bilemstsüa akumer, ta ashi.

Taiwan-China tesendaktep tamajungba kumer aliba mapang Biden-i Michigan semdang shilangba sülen White House nungi osangbener dang iba o ashi.

China-i Taiwan ya par litsü ta kibur kuma jembir, aser nüngdakra tashi amshia agientsü ashir. Taiwan-i parnok ya temeja linük ka ta ashir aser par temeden aser democracy wazüka ayutsü, ta ashir aser tensa majungba atema China tenüng asener.

Hokulbarnü China nunger National Day amungba anogo nungi tenzüka anogo pezü tsüngta China nunger air force tayimtsü 148 par southern aser southwestern air defense zone leni ait, ta Taiwan-i ashir.

Deobarnü United States-i China dang Taiwan anasa par mitkar inyaksangshi anentsü ajungshia liasü.

"Taiwan anasa People's Republic of China indang mitkartemi rara mesüba yimya amshiba atema United States-i süoki ia bilemstsür, koba ajanga region nung tensa tamajungba kumdaktsür," ta State Department indang odongtar Ned Price-i Deobarnü sangdong ka nung ashi.

Biden yagi Xi den September 9 nü minute 90 shi phone nung jembiba indang athishir amai angateter, koba ita tenet tsüngta mezüngbuba sensaksem liasü.

## Vietnam nung COVID cases tali akumtsü tetsübu nung lir

**Ho Chi Minh City, Mongputeni/Oct. 06**

**(Agencies):** Ketdangsürtemi Ho Chi Minh City nung alirtem ki yutsür mayazüksü ozüng tesashi agütsüba taoba hopta agenba sülen iba yimti nung aayanga alir Vietnam nunger meyerijang aika pei ki aliba tesem bushia ao tenzüka ajanga kanga kera menatepa aoba COVID-19 Delta variant ya prokshitsü, ta tetsübu nung lir. Vietnam nung COVID-19 tashidak wara ya Ho Chi Minh City tiyong sür prokshia liasü.

Hokulbarnü nungi tenüki nüburtemi iba yimti yutsür ainshiba ajanga Mekong Delta region aser Central Highlands nung ketdangsürtemi iba yimti nungi meyipa shilangertem tsüngsü pua quarantine asütsü tenzü, shirnok Ho Chi Minh City aser temeket province nung ita aika lockdown agi mapa mali aser chiyongtsü peria monguteti lia arua liasü.

Pei ki aliba province temi meyipa shilanger nisung 160,000 rongnung tang tashinung nisung 200 dak COVID-19 positive cases jangjateta lir, ta Zing News website ajanga Mongulbarnü ashi.

"Tang iba ama mapang ka nung nüburtem tziyüm ama kidangi meyipa shilangba ketdangsütsü kangasa tasak lir," ta Mekong Delta province nung ketdangsür Nguyen Than Binh-i ashi.

"Tesüba anogo asem tashi onoki tanen makai nüburtem

agizüka, tendanger, chiyongtsü agütsür aser tanenzükdak tesem agütsür. Nüburtem anogo tepiyong aser aonung motorbike nung senzür aser tzünglu arur, anungji duty nung alirtemi ajak asoshi raincoat alitsütsüa akumer. Parnok yasa-tzüraba anentsü atema onoki amtsük aser tzi alia agütsür," ta pai ashi.

An Giang-i motorbike nung nisung 30,000 aruba nungi tang tashinung tesadang ka shi ang tendangogo aser parok 44 dak COVID-19 positive putet, ta pai ashi.

Nüburtem onsara aruba ajanga ketdangsürtemi COVID-19 tendangtsü tasakba akumer, anungji Mekong Delta region nung Soc Trang aser Hau Giang province ajanga central sorkar dang Ho Chi Minh City aser temeket tesemtem nungi nisung yokba anentsü asüngdangogo.

Ca Mau province nunga COVID-19 cases tali akumtsü tetsübu nung ozüng kar salatsü aliba Hombarnü thinen aser yangji alirtem dang nüngdak nung dang kimai ayazüksü metetdaksü.

Ho Chi Minh City nung nisung tain shilem 99 nem vaccine dose mezüngbuba aser shilem 60 nem dose tanabuba agütsüba sülen lockdown salar alitsü.

Ajisüaka iba yimti nung anogoshi COVID-19 cases meyerijang dak tema puteter, kong Hombarnü positive cases 2,490 aser tasüba nisung 93 liasü.

## Scientist ana nem Nobel Prize for Chemistry agütsü

**Stockholm, Mongputeni/Oct. 06 (Agencies):** Taküm Nobel Prize for Chemistry sempet ya Max Planck Institute nungi German scientist Benjamin List aser Princeton University nung inyaker Scotland nung asoba scientist David WC MacMillan na nem agütsüogo.

Scientist ana indang mapa yagi pharmaceutical research tali tejakleni yok aser "chemistry greener" kumdaktsü, ta Royal Swedish Academy of Sciences ajanga Bodhbarnü sangdong ka nung ashi.

List aser MacMillan na külemi inyakba masü aser chemical reaction tekeraba lidaktsüba catalyst tabu tasen, asymmetric organocatalysis yanglutet. Molecular construction nung iba amala catalysts ya kanga tongtipang lir, ta academy ajanga ashi.

"Iba catalysis ya tongmelang aser kanga sangria yangluba lir, aser aikati kechiba iba ya yakta yongi mebilem ta süngmanger," ta Nobel Committee for Chemistry indang mendenpuba, John Aqvist-i ashi.

Sendaktepa aliba wadang nung inyaker scientist nem iba

senpet lemsatsüba ya tang tasen masü. Taoba küm iba sempet ya France nungi Emmanuelle Charpentier aser United States nungi Jennifer A Doudna nem agüja liasü. Tenati gene-editing tool ka yanglutet koba ajanga DNA melentsü atema lenmang sayuteta science asendenshidaktsü.

Iba konang nungya gold medal ka den sen Swedish kronor million 10 (USD 1.1 million dang timba) agütsür. Senpet ya iba senpet tentetsang Swedish inventor Alfred Nobel indang senmang ka amai lir, shiba 1895 küm asü.

Hombarnü Nobel Committee ajanga Nobel Prize for Physiology mesüra Medicine senpet ya America nunger David Julius aser Ardem Patapoutian na nem agüja liasü.

Mongulbarnü Nobel Prize in Physics ya scientist asem - US-Japan scientist Syukuro Manabe, Germany nungi Klaus Hasselmann aser Italy nungi Giorgio Parisi nem agüja liasü.

Ano literature, peace aser economics nunga Nobel Prize senpet tem agütsütsü lir.

## Central African Republic nung nisung 12 tepset

**Bambari, Mongputeni/Oct. 06 (Agencies):** Mongulbarnü Central African Republic nung sorkar anema nokdakba telungpur telok kati lenmang nung mita atar regional capital nungi aoba passenger gari asem maka mi senloktsüba lendong nung nisung 12 asü, ta osang ajanga ashi.

Garitem ya Bambari nungi Alindao jilai aoba mapang Coalition of Patriots for Change (CPC) den sendaktepa aliba telungpur temi arem nungi amak, ta prefect Victor Bissekoin-i Bodhbarnü ashi.

"Ibai kanga tia maka ka lir, kechiaser tai maket nisungtem

takum sama. Tang tashinung asüba 12 lir aser aika yiru, aser ano yirur alirtem ka karbo mekumzüktsü," ta Bissekoin-i ashi.

CPC teloki tang tashi osang kecha sangdonga mali.

Social media balala nung noksa prokshiba nunga semi-truck ka rongdoker temeket nung nisung tasümgang 10 shi liasü, anungji parnok ya mi nungi pilar asüba ta ajiteter.

U.N. mission in Central African Republic (MINUSCA) nungi ketdangsür katia iba lendong agütsüba ya jangjashitsüogo saka iba dak alaka osang tali tejangjaba nung magütsü.

Nütsümgang yongsük million 4.7 aliba Central African Republic linük ya hon-taripi nung kanga takar lir aser 2013 küm taoba tir Francois Bozize atsüngdokba sülen nüburtemi azüdokshi tia balala ajangshia arur. Nisung meyerijang aika pei talidak ki yutsür tesem balala nung jenoka lir.

Taoba küm tir election nung Constitutional Court ajanga Bozize shilem magidaktsütsü telemtetba agiba ajanga telungpur telok balala aser mitkar tsüngta tang tashi rarar. Taoba küm election nung Tir Faustin-Archange Touadera-i kümsük tanabuba takok ngua liasü.



Kranj, Slovenia nung EU summit alidang Slovenia Ato Kilonser Janez Jansa, tejaklen tiyong nung abelen, aser European Council Tir Charles Michel, tejaklen tiyong nung achichi, na EU aser Western Balkans lenirtem den külemi nokdaker tangokba noksa ka yangi angur. Balkans region nung aliba linük trok dang trading bloc nung adentsü metetdakja European Union lenirtem Bodhbarnü adenshia liasü, saka mapang lateta magütsü.

## September Melanger tasembuba takok ngua agiogo



Creative Arts Committee, Fazl Ali College züngsemtem tangokba noksa nung angur.

**Dimapur, Mongputeni/October 6 (TYO):** Kaketshirtem nem parnok sempet sayatsü atema Creative Arts Committee, Fazl Ali College, Mokochung sabang agüja arudar. September Melange ya kümshia iba committee yagi ayongzüka agir aser taküma September 20 nungi 30 tashi iba sabang ya online ajanga lapktsüogo.

Iba sentong nung kaketshir 90 dak temai shilem agi. Parnoki parnok tebilemba aser

nüklatem Art of Photography, kija kentenba, Painting, Musical piece, Covid-19 otsütem, Performance poetry, Creative video, kija tsüngsang, Innovative videos, Cosplay aser Digital poster amala tetoktepba ajanga sayua liasü.

Jenang ajak nung takok angurtem nem kuli kakat den senpet agütsüogo. Instagram nung timtiba like asüba photo aser YouTube nung timtiba reprangba video indang osanga sangdongogo. Tetoktepba 10

prongla ya FACSU YouTube aser Instagram account ajanga live sayua liasü.

Iba sentong ya reigning Miss Mokochung Akumla Imsong, L. M Double S Entertainment Mokochung aser YouTuber Lambu (Akum) nung teyari nung ayongzüka agiogo.

Kasa mapang nung tetoktepba balala tendangertem rongnung tesayur aser musician Nungsang (Musical Piece tetoktepba Chief Judge), Arong Mongro, Research Associate, International Centre for Environment & Sustainable Research Development (kija tsüngsang tetoktepba Guest Judge) aser Teka Imchen, Paramedic, CMO Tuensang, H&FW, Nagaland (kija tsüngsang tetoktepba Guest Judge) nung densema liasü.

Nagaland nung amenoker aliba streetwear brand 'Purity'-i sempettem sponsor asü aser October 2 nü Fazl Ali College Campus nung result sangdongba mapang 'Purity' Proprietor, Imkongtsukdak-i shilem agia liasü. Iba sentong ya Dr. Lanurenla, Convenor, Creative Arts committee, Fazl Ali College, Mokochung-i tepela anküp o jembir tembang.

## MULUNGNEN O



Lt. Dr. Lanuchuba

Asü: 29th Sept. 2021

Onoki teti meima aliba asür Dr. Lanuchuba ajongpen iba akümüli wadang tempangba mapang lokti aser kija shirnoki, rongsen, nubo, shisatsü aser sarasadem nung yaritepogo ajak dang kanga pelaba lemsateper.

Nenek mapa tajung, awashi melen onoki kecha magütsütetsü, saka teyanglur Tsüngremi maneni moajangma ta onok sarasadem.

*Temeim Kinungtsü, jabaso aser kinungertem*

## Longleng DPDB senden nung oxygen plant amenokba indang sensak asem

**Dimapur, Rongjui/September 6 (TYO):** Deputy Commissioner Longleng, M. Shayung Phom lenisüba nung October 6 nü DPDB hall nung Longleng District Planning & Development Board senden menogo.

Senden nung DC-i, Yachem CHC nung oxygen plant ka semzüksü aliba indang metetdaksü aser iba plant ya District Hospital nung amenoktsü liasü, ajisiüka District Hospital mesadamba ajanga mamenoktetsüsa aküm, ta shia ken o jangjashitsü. Paisa, oxygen plant lapoktsü atema sorkar den mapang ka atakzüker lir asünung H&FW department-i district hospital anasatiba mozüki kati belener aotsü tuyuba ama inyakogo, ta ashi.

CMO Longleng Dr. Obangjungla-i, transportation nung tetsükdaksü adokba ajanga oxygen plant ya bilemba ama matongteptet, ta ashi aser EAC Yachem, Pichano Kikon-i, oxygen plant lapokba sentong atema jenjang balala agibatam metetdaksü.

Kasa mapang nung ADC Longleng aser OCL tir D. Robin-i, Officers' Club, Longleng indang jenjang metetdaksü aser züngsemtem dang, state mokdanga ayuba

ajanga imlaba ama sentongtem ayongzüka magitet ta ashi. Paisa, underage inter-state badminton tournament Longleng nung ayongzüka asayatsü anungji lanurtem ajungmesotsü atema Longleng Inter-departmental Badminton Tournament, Officer's Club-i achayanga November tatemlen mesera December ita mezüngbuba hopta nung asayatsü, ta metetdaksü. Pai, ketdangsür aser department ajak dang iba asayamung nung jangrabangra shilem agitsü mepeshia metetdaksü. Robin-isa, züngsem tasentem dang parnok tenzüng züngoksemtü aser registration fees den annual membership senyur nem agütsütsü metetdaksüba den tanga club züngsemtem dang parnok indang annual membership agütsütsü metetdaksü. SDPO Longleng & Treasurer, OCL, Impung Chang-i wara ajanga state mokdaker liaka club-i maparen balala inyakba indang metetdaksü.

Maneni senden nung züngsemtemi GPS (C) Orangkong nungja GPS Hamlikong agi melentsü benok. SDEO, Longleng-i iba dak sendakba nung ken o jangjatsüba aser VEC Orangkong-i temelaba agütsüogo ta ashiba sülen iba ya benok.

Assistant Programme Coordinator (RD), Longleng, Tongpang-i, Rural Development Department, Longleng indang inyakimtem PowerPoint ajanga metetdaksü. Paisa, National Level Monitoring team (NLM)-i October 9 nü Longleng semdangtsü ta shi line department tem dang station nung atatsü mepeshia metetdaksü.

Taruba DPDB senden nung Power Department-i parnok inyakim metetdaksütsü. Senden nungsa züngsem tasentemi parnoksasa metetpela liasü.

## Peren DPDB senden menogo

**Dimapur, Mongputeni/October 6 (TYO):** Ita shia amenba Peren District Planning & Development Board (DPDB) senden October 6 nü DC Conference Hall, Peren nung maneogo. Iba senden ya DC Peren-cum-DPDB Vice-chairman, Sentiwapang Aier, NCS lenisüba nung agi.

Senden nung SDG Cell tentetsü, Tening Aspirational Block atema Five Year Action Plan, Public Parks (DPR) Committee, Captain Kengurüse tenüng nung lenmang ka jatsütsü aser GHSS Jalukie nung Multi-purpose Building ka asütsüba onüktem benok sensak asem.

Senden nungsa Lungziu Development Organisation züngoksemtü atema mulung agizük aser sorkar dangi iba ya abentsü telemtetba agi.

SDO, PWD (R&B), Peren

sub-division aser 7buba Inter-Departmental Badminton Tournament Convener, Er. Asembe Mbungcha-i house dang iba asayamung ya November 5 aser 6 nü asayatsü ta metetdaksü. Paisa, tenüngdakatam aser tanga inyakimtem mapang tatsüka tsüngda metetdaksütsü ta ashi.

Kasa mapang nung October 1 nungi 31 nü tashi agitsü aliba Clean India Programme indang action plan lemsatepba mapang State Director in-charge NYKS, John Makhoba-i, iba sentong ya Azadi Ka Amrit Mahotsav kübok yanglu aser linük ajunga nung jana bendena intoktsü atema nüburtem pei mulungka nung arua shilem agidaksütsü asoshi achayangtsü nükjidong nung iba sentong yanglu, ta ashi.

Paisa, iba sentong kübok tongtibang inyakimtem

rongnung plastic janatem, khen dang amshiba plastic tem bendentsü, yimtsüng tebor junga yanglushitsü atema inyakimtem aser traditional water resources anepaluba inyakim tem densema lir, ta ashi. Iba sentong kübok plastic seret lakh 75 bendena intoktsü nükjidong lir.

Peren DC-i sentong takok ngua inyakyonga aotsü atema ministries/departments/agencies tem dang keta lir, ta ashi. Iba dak sendakba nung pai, clean India programme takok ngua benoktsü atema sentong dak sendaka alirtem dang bendanga agüja teka amteper inyaktsü mepeshia metetdaksü.

Taoba senden nung board züngsemtemi nongloktsüba ama DPO (LRD), Alemla Aier-i department inyakim balala indang PowerPoint presentation ka agütsü.

## NAAME-i 15buba Foundation Day mungogo



**Dimapur, Mongputeni/October 06, 2021 (TYO):** Deobarnü (03.10.2021), NSONJI, Sendenyu Village nung Nagaland Association for

Adventure Mountaineering and Education (NAAME) puri 15buba Foundation Day mungogo, ta NAAME president, Ruokuovikho Chale

aser NAAME secretary Pukil Kintso nati sangdong ka ajanga metetdaksü.

Tang alirtem aser tarutsü asoshi tesem tajung yanglutsüba atema, Sendenyu Baptist Church Centenary Memorial Park maparen achayangertem dang tentet ajanga pelaba metetdakja liasü.

Sendenyu Baptist Church Centenary Memorial Park ajanga nüburtem maneni temoatsü angutsü imlar, ta NAAME-i lemsatep.

NAAME-isa "GREEN

INITIATIVE" mapatong maneni tejakleni bener aotsü aser Indian Mountaineering Foundation (IMF) kübok linük tesem ajunga nung tesendaktep tajung yur State nung Eco-Tourism ajungkettsütsü asoshi bangjemtep.

NAAME ya IMF den sendaktepa lir aser National Level nunga vote agütsütsü temeden ngua lir. NAAME-i züngsem aser executive tasen den longjemer maparen inyaktsü asoshi nangzükogogo, ta kasa sangdong nung shia lir.

## Thonoknyu nung volleyball asayamung tembangogo



**Dimapur, Mongputeni/October 6 (TYO):** Tsokum benjung den repsema Friends Club Thonoknyu-i ayongzükba volleyball asayamung shibangba sentong, Primary School, Pathso Nokeng Primary School head teacher M. Tsongtsa-i moaja liasü. Iba asayamung ya October 5 nü Local ground, Thonoknyu nung tembangogo.

Sentong nung alakteta jaokeri asayamung nung shilem agiba team tem dang

maneni yimya yimpong tajung aser asaya yimya tim benoka asayatsü ajungshi. Asayar ka akümtsü atema pei saksa pei yimayimpong aziöktsüji ajak dang tongtibangba ta shia pai, asayartem dang chichiba asayar kaka ama yimya yimpong shidak benshia parnok sempettem sayatsü ayongzü.

Asayamung shibangba sentong ya Referee Inspector, P. Yamso Shiu lenisüba nung agi aser lokti pelaa agizükba o Referee Commissioner, P.C.

Kamthong-i jembia liasü. Sentong nungsa Melody Voice Elite volleyball Club Thonoknyu town aser Tsoiphu volleyball Club nati ken kaka aten.

Tebur final asaya Tsoiphu Students Union 'A' aser Chilliso Eastern volleyball Club 'C' na asaya aser Tsoiphu Students Union 'A'-i koka liasü. Tetsür asaya final Jengphu Sporting Club, Thonoknyu village-i akok aser United Mother's Club, Thonoknyu town runners-up liasü.

## FIH Stars Awards; Harmanpreet & Gurjit nati best player naroküm angu

**Mongputeni/October 6, 2021 (Agencies):** FIH Hockey Stars Awards 2020-21 nung India nung asayar aser coach temi takok tajung nguogo.

Gurjit Kaur (best player, women), Harmanpreet Singh (best player, men), Savita (best goalkeeper, women), PR Sreejesh (best goalkeeper, men), Sharmila Devi (best rising star, women) aser Vivek Prasad (best rising star, men) nung den tetsür aser tebur coach Sjoerd Marijne (Netherlands) aser Graham Reid (Australia) natia parnok indang category nung takok nguogo.

Tokyo Olympic Games nung India team-i bronze medal nguteta asayaba nung Harmanpreet ya goal timtiba agütsüba asayar liasü. Pa Belgium nung asayar Arthur Van Doren aser Alexander Hendrickx aser Australia

nunger asayar Jake Whetton, Tim Brand aser Aran Zalewski nung den nominate süa liasü.

Sreejesh-i Olympic Games 2020 nung India team asoshi kanga junga asayaba ajanga goal keeper award pa nem agütsü. Pa Belgium nung asayar Vincent Vanasch aser Australia nung asayar Andrew Charter na den nominate asü.

Savita, shiba Olympic Games 2020 nung India tetsür hockey team vice captain liasü, laia goal nung kanga junga nokdak aser India team pezübuba jenjang tongteta asayaba nung teyari tulu agütsü.

Kasa mapang nung Vivek-i iba naroküm küm anabuba atonga nguogo. Pa South Africa nung Mustaphaa Cassiem aser Australia nung Sean Findlay na den nominate asü.

Fan tem dak alia linük 79

nungi national captain aser coach temi iba naroküm atema vote agüja liasü. Taküm fan 3,00,000-i vote agüja liasü.

Belgium tebur team aser Netherlands tetsür team shirnoki Olympic nung hockey asaya koka liasü, parnoki FIH Hockey Pro League akok aser iba den Great Britain tetsür team nema vote agütsürtemi tetushi tulu agüja liasü.

2020 küm covid wara ajanga FIH Hockey Stars Awards sentong magi aser taküm tetushi agütsüsüpür ya January ita nungi Olympic Games Tokyo 2020 tashi nung asayaba asadanga liasü.

Vote agütsüba ya August 23 nü tenzüik aser September 15 nü tembang.

National federations temi vote shilem 50, fan aser asayartemi 25 aser media-ia shilem 25 agütsü.

## Asayartem mezümgmeshiba agi Chiellini aaker

**Mongputeni/October 6, 2021 (Agencies):** Juventus defender Giorgio Chiellini-i, Napoli nung asayartem Fiorentina fans temi Deobarnü shilu dak ajemdaker mezümgmeshiba angazüka Italy nung ka ama kanga aakseta bilemer, ta ashi.

Napoli defender Kalidou Koulibaly shiba tanak nisung ka lir pai ashiba agi, pa Fiorentina fans temi mezümgmeshi aser kasa mapang nung Victor Osimhen aser Andre-Frank Zambo Anguissa nata fan temi mezümgmeshiba Gazzetta dello

Sport sangdong ka ajanga metetdaksü. Iba asaya Napoli-i goal 2-1 agi koka liasü.

Bodhbarnü Italy team Spain den masaya tsüngda osangbenertem den sensaksemba mapang Chiellini-i, iba amala mezümgmeshi ya khenyongi agizüktsü makok, ta ashi. "Temzüng ozüng tapet nüngdaker. Iba ya ajak dang tongtibangtiba," ta pai ashi.

"Italy aser Tuscan nung ka ama ni aakseta liasü, kechiyong kü atemabo Italy ya racist linük ka masü.

"Jenjang tapet karbosa

agütsüla, ajita mesera bendanger dang asenok noksa tamajung sayur," ta Chiellini-i ashi.

Italy nung football asaya nung shilu dak ajemdaker mezümgmeshiba kanga bulua kümogo. Taoba ita AC Milan midfielders Tiemoue Bakayoko aser Franck Kessie na Lazio pusemertemi mezümgmeshiba dak sendakba nung prosecutors temi bushisüngdang tenzüikogo. Kasa mapang nung Juventus-ia, August ita racist dak sendakba noksa ka parnok indang tetsürtemi tweet asüba atema tatok meshiogo.

## Boxing World Championships atema Lovlina qualify süogo

**New Delhi, Mongputeni/October 06, 2021 (Agencies):** Aruya aliba Women's World Boxing Championships atema, Boxing Federation of India (BFI) ajanga Tokyo Olympics nung bronze-medal angur Lovlina Borgohain (69kg) nem 'direct entry' agütsüogo.

Iba asayamung atema tanüngba asayartem ya aruya aliba National Championships nungi gold medal angurtem shimer squad nung anioktsü sentong lir.

National championship ya Hisar, Uttar Pradesh nung October 21, 2021 nungi tenzüka asayatsü.

"Tokyo Olympics bronze-medal angur Lovlina Borgohain-i direct qualification ajanga world championships nung shilem agütsü asünung, 69kg category dak alaka, category shia nung gold medal angur boxer temi AIBA women's world championship nung asayatsü maongka angütsü," ta

Boxing Federation of India sangdong ka ajanga metetdaksü.

Tokyo Olympics nung junga shilem agiba asadangteta squad nung aniokba sülen, aruya aliba World Championship atema Lovlina-i national asayamung nung shilem agütsü menüngdaker.

Women's World Championship ya taküm December ita Istanbul, Turkey nung ayonga asayatsü sentong lir. Iba marquee tetoktepba atema asayamung achaayangertemi yakta anogo lemtetsü.

Maneni, tebur world championship, koba Belgrade, Serbia nung October 24, 2021 nungi asayatsü sentong lir, iba atema

tebur national camp ano metenzük.

Sangdong ka ajanga ajangzükba agi, taruba anogo ana tsüngda Patiala, Punjab nung men's national boxing championship tenzüksü akok.

## Nüngtugu basketball asayar Pau Gasol asaya nungi anener



**Mongputeni/October 6, 2021 (Agencies):** Spain nung nüngtugu basketball asayar Pau Gasol-i asaya nung anentsü atema telemtetba agiba sangdongogo.

Gasol-i pa basketball asaya nungi asnenba osang ya Mongolbarnü sangdonga liasü. Küm 20 dak tema asayaba mapang NBA title ana aser Spain nationl team nungi world championship gold ka anguba sülen pa asaya nungi anener.

Gasol-i August ita Tokyo Games nung United States-i quarter final nung Spain tsükdaktsüba sülen pa international basketball asaya nungi anenba metetdaksü. Pai Olympics pongu tashi nung shilem agiogo.

Gasol ya February ita nungi Spanish club Barcelona nung asayaa liasü. Pa asaya aliba mapang tetsüng tabelenlen yiruba sülen küm anashi masayai liasü.

Gasol-i 2009 aser 2010 küm

Lakers nungi NBA titles ana akok. Pa Memphis Grizzlies, Chicago Bulls, San Antonio Spurs aser Milwaukee Bucks nungia asayaogo. Pa 2001 küm NBA draft nung tasembuba jenjang nung liasü. Pa Atlanta-i shim aser Memphis dang ayok.

Gasol NBA nung tatemsa 2019 küm Bucks nungi asayaogo. Iba küm pa Portland Trail Blazers nungi asayatsü atema tenangzüktepba yanglu ajisüka khen danga masayatet.

Gasol-i Spain tenüng nungi asayaba mapang world championship title 2006 küm akok aser iba den bendenloksema 2009, 2011 aser 2015 küm European titles kokogo.

2008 küm Beijing aser London nung Olympics asayaba mapang Spain team-i silver medal anguba nung pai teyari agütsü aser Rio de Janeiro nunga bronze medal nguteta asayaba mapang team nung pai tongtibang shilem agi.

## BILEMDANGANG

"Na melenshitsü atema nü dak dang tashi lir."